

豬腳 kho

藍春瑞

(桃紅字：表聲音內容)

1、話頭

雙溪好命囡，徙來街市拚，奸巧 bē 輸精，áu 蠻 ták 項贏。

平--a 生 5-ê hāu-siⁿ，頭 tsiuⁿ-á 活無過 3 歲，siōng ban--ê 32 歲過身；另外有生 2-ê 查某 kiáⁿ，早 lóng 嫁--人-a；nā beh 論歲，大漢查某 kiáⁿ 65，應該是 iáu tī--leh。

Kúi 冬前，tī 頭城，我 bat pōng 過第 3--ê 威煌，ah-nā 現此時，連 i mā m̄ 知死 ùi toh--a，強 beh bē 記 tit in tsit-tīn 兄弟姐妹是生做圓 àh 扁，準有 koh 當面 tú--著，恐驚 ē 無法 tō koh sio 認--lō。

平--a kap A 文是 kāng 桃 (thiāu) á 內 ê 叔輩兄弟，tsiah 差 1 歲，2-ê 人 ùi 穿開 kha 褲 á 起，做伴 teh 內山掠魚 liu、黏田 iⁿ kap 偷 bán pát-á，連看牛 mā 同齊，koh 讀日本時代 ê 頂雙溪公學校，kāng 28 屆 (1932) 出業，teh 內平林 ê 番 á 坑娶某、生 kiáⁿ....；1943 太平洋戰爭 tng 燒熱 ê 時，平--a 出來雙溪街 á 做 liáu 柴 ê 生理，準無 thang 大 thio，加減 mā 有 thàn kúa 所費；1946 年 súa 來頭城街 á 開鋸木工廠，2-ê 同齊 phah-piàⁿ 兼做建材、五金 ê 買賣，生理 bē bái；就是 tiàm tsia，平--a thàn 著 tsiaⁿ tsē ê ke-húe。

M̄-koh，平--a 是大地主 ê kiáⁿ，有錢 koh 奸巧，tiaⁿ 著是 i teh 做頭家管眾人；ah-nā A 文，是做 i ē kha 手 ê sin-lô，替 i kuaⁿ khabang，thàn 月給 niá。Kiⁿ nā 有好 khang--ê，是獨獨平--a 1-ê 人 tit--去，tiòh-ài i 食 kàu kéⁿ-kui、tsik 舌，吞 bē 落喉--ê，tsiah 有 thang 分 pát 人 hàu-ko；一直 kàu i 60 歲，掠去 thióng-á 埔種 hit 冬，iáu 是 tsit 種性地，頭 kàu 尾 lóng 無變--過。

2、海軍武官府 ê 證明

Pháiⁿ 心起橫攏為貪，借題軍用拖來斬；

風聲 ē 傳有較 hám，連累某囡才是慘。

Hit-tsūn 大東亞戰爭 tng-teh 進行，頂雙溪 hit kho 圍 á ê 煤礦所出 ê 油碳，ē-tàng 做 kho-ku-suh，是 phah 鐵煉鋼 tsiáⁿ 要緊 ê 原料，是日本人 tsin tì 重 ê 生產事業，所以 nā kap 做碳礦有牽連 ê khang-khùe、sit 頭攏 iáu bē-bái；khah úa 山邊 ê 魚行 á、內平林、牡丹 kap 石壁坑有 4~5 間日本人 ê 會社 teh 採碳，為著 thō 碳 ê 出入、坑木 á (相思 á 樹) ê 買賣，àh 是礦山器材 ê 修理 kap 運搬 ê 利便，in lóng 有 tī 頂雙溪街 á 設碳埕、pho 輕便鐵 ki 路 kap 辦事處；平--a 招 1-ê 日本人合股來 tsia 設 liáu 柴館 tú 好有合著時機，加減有坑木 á、liáu 柴 ê 生理 thang 做；tī hit 款戰亂 ê 時 tsūn，日子 to m̄ 是 tsin 好過，m̄-koh 有 thang thàn 食，就算 tsiáⁿ ka-tsai--a。

註死m死，hō平--a 去 bat 著 1-ê 買賣木材、油碳 ê 大盤生理人，號做財--a，tiāⁿ-tiāⁿ 來來去去 teh puaⁿ-núa，jú tau jú bā，bē-su 穿 kāng 領內褲 ê 親兄弟 án-ni；有 1 工，平--a kā 財--a 講：「聖王公廟邊，有 tsiaⁿ 10 叢 2~3 人 siām ê 楠 á...，你知--無？」

「Lín niā，tse 我 thài ē 知--leh！」

「Aih-ioh！你 kám tseⁿ-mê--hioh？」

「Lín-pē tsiah 無 hit-lō íng 工去想 tsit 款無事屎 ê kang-khùe！」

「Heⁿ nō...，siáng m̄知你 tshiāng-tsāi ùi hia 去 tshūe 3-tè 厝 ê A 美，頭殼內 khah 想 mā hit 項，tiāⁿ 著 bē 去 tsim-tsiok tse，著--無？」

「好--lah，mài thuh 臭--a；你講 tse，是 beh pìⁿ siáⁿ--leh？」

「你 tiām-tiām 聽...；...真正大叢 koh súi，nā tshò 來 liáu--khui，就 báuh--死-a！」

「免講 mā 知！...m̄-kú，保正、派出所 ê 大人、庄役場 ê 大小官 hiah tsē，beh án-tsúaⁿ 落 kha 手--leh？」財--a 雙手 tshah-koh，目矚金 sih-sih，liáh 平--a 一直 siòng。

平--a kiāⁿ úa 來耳 kang kîⁿ tsiaⁿ 細聲：「.....ù 頂頭壓--落-來，就免 kap in tsit-tīn 人 a-m̄ a-peh...；郡役所 ê 人你 koh 有熟，應該有步 thang 想？」

「Mh...；我想....，郡役所 iáu 無夠力；...ke kúi 工 á beh 去基隆，我來 tshūe 日本朋友 tsiaū 看--leh。」

隔 1-kò 月，財--a tsah 1 張頂 kûan 有 tng 紅 kî-kî ê 大印，m̄-bat 人看--過 ê 證明單，tshua 平--a 去庄役場講...，...海軍武官府 beh 徵用聖王公廟前直徑 tsüⁿ 1 米 ê 樹 á 來造船。

Hit 張證明 ê 官印 kah 是真--ê，無人敢 haiⁿ kah 半句；kāng tsit ē-po，kui-tīn 人約來廟埕現看，用尺量--過-來 koh 量--過-去，tshūe 著 16 叢有 háh 寸尺 ê 樹 á，tiau 工用紅漆寫 2 字「軍用」做記號 liáu，財--a kap 庄役場 ê 給事 á，現 tsiaū beh 來 tshò ê 日 á kap kha 手。

Koh 1 禮拜，庄役場派足 tsē 公工來...，1-khiang 1-khiang 鋸 hō 4 米長，另外 koh tshò 廟邊 khah sè 叢 ê 樹 á，鋸做 súa 柴 khoⁿ ê 木馬 á，順 súa khui 1 條 beh kiāⁿ ê 柴路，kā 柴 kho sak úa 來有輕便鐵 ki 路 ê 所在，搬 tsüⁿ 輕便車，運來平--a ê 製材所 liáu。

無 jūa 久，就有人 hán 講是平--a 去報--ê；nā 無，日本人 ná ē 知 iáⁿ 聖王公廟有 kúi 百年老 ê 楠 á thang tshò--leh？mā 有人講...，街 á 底獨獨 1 間製材所是平--a 開--ê，ē 去 ín tsit 種 kang-khùe，m̄ 是 i kám iáu 有鬼--leh？

Siōng 食力是 2~3-ê 入去製材所做公工傳--出-來-ê 話...，in 講 liáu--開-ê 柴，用火車運走--ê tsiah 3 份 1 份，tshun 2 份一直 kàu 半冬後，to iáu 好好 khng tī 柴埕，講 tse 就是平--a 藉日本人 ê 勢面，ù 聖王公廟 hia o-se 來 ê 利頭，風聲 hán kah kui 街 á 攏知，連 in 老 pē mā 聽 bē 落--去。

廟埕 sì-kho-liàn-tng ê 樹 á，無分大細攏 hông tshò liáu--a，tī hit ê 戰爭 tng ân ê 時代 kan-taⁿ 有 íng á 話 teh 傳，無人敢出來 tshiāng 聲，mā m̄ 知 beh 去 toh tâu。有 1 工；平--a kap tú-tsiáh 有身 ê 某——市 á 來聖王公廟拜拜，koh 寄附 bē tsió ê 添油香錢，廟公 kap 庄 á 頭 ê 人 lóng bat 平--a，有 úa 來 kah in ang-á 某 sio 借問，頭 kàu 尾 lóng 是嘴唇皮款待 niā-niā。

後--來聽人講，是 in 老 pē kà--i-ê，kap 市 á teh-beh 生 gín-á 有 kúa 牽連；廟邊 ê 人 koh king-thé 平--a 講...，tshiuⁿ i hiah 凍霜，koh siàⁿ kah 無神無鬼 ê 人，ē 撥工來拜聖王公，tiāⁿ 著是心肝頭有 siáⁿ-mih gāi-giòh；nā 無...，khah ē hiah piàⁿ 時--leh？

Hit 年，冬節 ê tsin 前，市 á 生 1 粒 lān-pha，平--a kui 家，thiong kah beh 害--去；做滿月，thài 豬公辦桌請所有 ê 親族 á kap 厝前後壁，連保正、大人 lóng 來 tau 鬧熱；獨獨聖王公廟 hia，無來 kah 半 ê，是 m̄ 是冤仇帶深所 tì lán 無清楚；m̄-koh，有人 teh 講 hia ê 頭人 tī 聖王公面前 pùah 無 pue，kui-tīn hō 齊，無 ài 來 hō 平--a 請。

2 年後，gín-á 無 tiuⁿ 無 tí làu kap 吐 koh 兼發燒，hit 時 tsūn 戰爭 iáu bē suah，醫藥 tsiāⁿ 缺 hát，būe 送 kàu 基隆，就 giān-giān bē siau-kiān，做 i 去--a；跳月，市 á mā m̄ 知 ùi toh 生出來 ê 病，mā 送 kàu 基隆醫，拖 kò 外月 tsiah 過身。

Tī 柑腳、內平林 sak 輕便碳車 ê 做工 á，攏 hūe 講...，kui 庄 ê 百姓，bih 空襲無 khiau 半 ê，顛倒平--a in-tau phua 病 ê 有 2-ê，koh 是 ùi 尾 á 死 tò tng--來，是聖王公有 siàⁿ ê 緣故...；風聲 án-ne teh 傳，hō 平--a 聽 kah 心狂火 tòh。

Tui 平--a 來講，連 súa tsit 2-kái ê 凶事，是 tsiāⁿ 大 ê kùe-tng kap kà-si；m̄-kú A 文 teh kā tau-saⁿ-kāng ê 時 tsūn，講平--a 連 1 點 á 反悔 to 無，ngē tsēⁿ 講楠 á 是戰爭徵用--ê，m̄ 是 i 去報日本人來 tshò--ê，鋸 tshun ê 柴 kho、是日本人賞--i，準做代工 ê 手 sò 料錢，i 無 thàn kah 半 sián；ah-nā 某 kiāⁿ ê 過身，是 pháiⁿ 運碰著戰爭，m̄ 是 i 害--ê，是天意 beh 叫 i koh 娶第 2-ê 某，mā m̄ 是聖王公有靈 siāⁿ。A 文 i 做人 ê sin-lô，領有月給就 tsin ka-tsai--a，bē ài kap i tsēⁿ tse。

Kāng hit 年 ê 5 月節，平--a 26 歲 ê 時陣，真正娶第 2-ê，號做腰 á，聽講 tsit-ê 新娘，súi kah ē 驚--人，平--a 真正有 thiong--著，kui 家夥 á lóng 有 kah-i，mā-kú 時機 bái kàu būe 講 leh bái，i m̄ 敢 siuⁿ tshiaⁿ-iāⁿ，tsiah 辦 4-tè 桌請雙 ping ê 親 tsiāⁿ，A 文 mā 有去；būe 過中秋，日本帝國就 kiāⁿ--去-a。

3、來頭城 ê t'ai-tsi

雖罔基隆 piⁿ 無成，換來頭城大經營；
佳哉 tú 著好光景，財旺某 súi 攔有丁。
鬼計增資舞進前，好 khang 大趁我總 khing；
收買阿文誠顯明，艱難困苦伊做先。

平--a tsin 奸巧，料著日本 ē 戰敗，早就 hām in 老父參詳 beh 去基隆 sîn 日本人 páng--落來 ê 工廠，銀票 á kap kha 手 mā tshuan 好--a；koh 無 1-kò 月，日本就 un--落去，有 iāⁿ 免 siáⁿ khai 著本，就佔著 1 間 beh phái-á beh phái ê liâu 柴館，A 文 in ang-á 某 mā 有 tūe--去，整理 tsit 間 hō 美國人空襲 kah 歪 ko tshih-tshuah ê 舊工廠，無 ìng tshih-tshih 舞有 2-kò 月 hiah 久，機台 tsiah beh 動工 niā，tú 著市政府來趕人，kám ē 日本人賣 hō 平--a 過名 ê 手續無齊全，ah 是碰著比平--a koh-khah hiông ê 鱸鰻狗鯊 teh piⁿ 鬼，lán 就無 tsin 知，橫直平--a 領著 1-kúa 補貼金，就 hông 趕--出來。

看是無 tsē ê 補貼，m̄-koh tse 是免本去 khioh 著--ê，tú 好人來報，頭城有 1 間舊鋸木工廠 beh 賣，tsuaⁿ-á 用 tsit-tù 做粿 tshè，招 8~9 ê 股東，大概 á 看 ē-sái，khing

錢就 kā 買--a, tsit 內底, 平--a 是 siōng 大股; tsit 間比雙溪--ê khah 大, úa 鐵 ki 路邊 ê 柴埕 mā khah 4 正, 起落大柴 tsin 利便, 股東 tsiâu 有來看, 攏認定 tsia 後過應該 ē 比雙溪 khah 有出路, 意思是 ē 做--tit。

平--a hiām 腰 á 顧 siàu 櫃、ka-kī ê 小妹做出納、大 hàn 小弟安 á 負責顧柴埕, 第 2 小弟順 á khah m̄-tsiáⁿ 人, 就叫 i tau 鋸柴, ban 小弟讀國民學校過來 úa i 食, 2-ê 妻舅 á mā 叫來做大割鋸台 ê jī 手, àn 頭 bāu kàu 尾, 1 半攏親 tsiáⁿ, 好 khang--ê 留 hō ka-kī ê 人, 就是 án-ni。現金、支票 kap 銀行 ê 往來, 平--a ka-kī lák-tiâu-tiâu, 有 thàn 無 thàn tiòh-ài i 講 tsiah 有準算, 生理做 kah 鬧熱滾滾, 埕--nih ê 柴 kho jú 圍 jú kúan, 工人 1 冬 1 冬 tsē, 鋸台、輕便台車一直翻新, koh 買 1 套自動磨「帶鋸」ê 機器, 專工 tshiáⁿ 1-ê 師 hū piⁿ tsit 項; 照 tsit 種新舊替換 ê kè-sè kā 看--起-來, nā 講無 thàn 絕對是 hâu-siâu--ê, 鬼 mā m̄ 信。

M̄-kú, ùi 1946~61 年內底, 公司 tak 年 ê 配東 to mā 意思意思, 無論股東 án-tsúaⁿ 問 án-tsúaⁿ 查, 平--a 攏面皮厚厚, kik 麻麻, ki 在人唸,橫直我 siōng 大股, ah 無你是 beh án-tsúaⁿ--leh! tã-tsi suah 變做 i 1-ê 人 teh 好 khang koh m̄ 分--人, hō 股東感覺足 tsheh 心, 無 ài kap i sio 交 tshap--落-去; siōng 厲害--ê, 是「大股食小股」ê 步 sò...., i 用 σ-se 來 ê 股本增資, 其他 ê 股東 nā 嫌無配東, 就無 beh tùè, 小股持分 ê 比率 jú 來 jú kē, bē 輸霜 á kak teh iūⁿ käng 款, ná 來 ná 細 tè, 眾人 kiâu kah 無 1-tè 好, koh 無 i 法。

Tsit 15 冬內, 腰 á tī ang 婿大 thàn 錢 ê 時 tsūn, 生 2-ê 查某、3-ê 查甫, 有財、有丁、koh 有 1-ê súi ká-ná 仙女 ê 少年某, tsin 正是好 khang 攏 hō in khioh-khioh--去, hō 平--a m̄-tāⁿ 是 hiau-pai, teh 親 tsiáⁿ 朋友 ê 面頭前, koh 臭屁 kah liáh bē tiâu。

所有 ê 股東 nā m̄ 是親 tsiáⁿ, 就是熟 sãi kah 有 tshun ê 厝邊頭尾, 應該 ē 惜情 tsiah 著, phian-phian tú 著心肝 kheh-eh、áu 蠻 ê 平--a, tsuaⁿ-á 無人 koh 去 tsim-tsiok liáu-thàn ê 假戲, 出在 i 去烏白 puaⁿ。

A 文 tī tsia 做外場收 siàu、羅東買柴, mā tiòh kap 鐵路部、稅捐處、警察局 tsiah-ê 官廳做 tsih-tsiap、púaⁿ-núa ê khang-khùè, 有 tit 著平--a ê o-ló kap kau-tiāng, tī 1958 年股本增資 ê 時, 特別送 3% ê 股 siaⁿ hō A 文, 買收 i ê 心, 叫 A 文爲 i tsing 生 tsing 死 ê 意思 tsiáⁿ 明; 雖 bóng 是 1-ê 空殼股東 ê 名, tak 年 iā 無 siáⁿ siâu 配東 thang 領, 總--是 A 文 ē tùi 平--a bē 講 leh 死忠, kàu 平--a 60 歲(1978 年)掠去種 hit 工, mā lóng 無變; to 有人講是平--a gâu 用人, m̄-kú 我顛倒 beh 信講..., 有錢 sái 鬼 to ē e 磨--a, 無講是 1-ê 內山 ê kó-i 人, 生成 khah 好 tshe-kà。

4、細漢小弟 ê 自盡 kap 老 pē 過身

迷戀杏花 ban 小弟, 甘願食藥爲伊死;
無辜發熱小女兒, 無張無持 kha 麻痺。
序大有歲七十二, piak 破腦筋 bē 赴飼;
無常原本是隨時, 星光月暗說悲喜。

平--a siōng 細 ê 小弟 kap i 差 1-khí 年, 國民學校出業 liáu 後, tng 去內山 hòiⁿ

來 hòiⁿ去，tshit-thô 有 8~9 冬，tsiah koh hōⁿ平--a hiàm 來頭城 kap i tùa，是鋸木工廠 siōng 好 khui ê 時 tsūn；阿兄日子 hiah-nīⁿ好過，tiāⁿ著無派 khang-khùe hōⁿ小弟做，koh tiau 工買 1 台新型 ê kha 踏車，除了 kā 厝邊頭尾展風神以外，mā 有 beh hōⁿ i 出入 khah 利便 ê 意思，tú 好 hōⁿ tsit-tsih tshio 雞 kak-á，騎去 lim 酒、風騷、phāⁿ查某 niá，m̄-bat 做過 1-項 khah tsiáⁿ樣 ê sit 頭 thang hōⁿ人 siàu 唸...；真正無 jūa 久，有人 kā 平--a 偷講：「lín 小弟 kap 杏花樓 siōng 紅牌 ê 酒家女 teh kiáⁿ....」

爲著 tsit 件 tãi-tsi，平--a tsiáⁿ受氣，kā 苦勸 tsiáⁿ tsē kái，有嘴講 kah 無 nūa，tāk 項攏 piⁿ無效 liáu 後，去想著 1 招 kā 錢束 ân，beh hōⁿ in 小弟 tú 好用，無 liōng-siōng 錢 thang 去 tshūe hit-khor phù-a-bâ ê 鬼計；i 想講 nā kah 無錢...，小弟就 piⁿ無 lián，煙花女 ē 無來--去，1 遍刀斷，tãi-tsi suah-suah 去。

料 bē kàu，禁 m̄ 發所費 ê 齣頭 tòng to 無 1 禮拜，tsiah 27 歲 ê 小弟就食 m̄ 著藥 á，嘴角 buh 白 pho 面 á 反烏，頭 tin 落來眠牀邊死 khiàu-khiàu--a，牀櫃頂 tó 1-ki 空酒 研 á，枕頭頂有 1 張遺書，內底寫 siáⁿ碗糕無人知；hit 台 tshit kah 金 sih-sih ê kha 踏車，原在好好 tshāi tī 門邊，m̄ 知 in 主人已經 kiáⁿ--去-lō。Tse 是警察 kap 1-tīn 官廳 派 beh 來驗屍 ê 人，būe 來 ê tsin 前，我親目睷所看--著-ê；驗 suah，平--a kap in 老 pē 母 kā in 小弟 moh tiâu-tiâu，哀天叫地，khàu kah 足青慘。

Hit 年，我 6 歲，tú-tsih 讀國民學校 1 年，iáu būe bat 生死 ê tãi-tsi，頭殼內一直 teh 想...，有 kha 踏車 ê 好額人，m̄ 是真 sóng？是 án-tsúaⁿ koh beh 去自殺--leh？kám 講好額人 tsiah 有法度自殺，散凶人 á khah gōng，bē 曉--tit？

平--a in ang-á-tsiá tng teh 無 íng 辦喪事 ê 時 tsūn，tú-tsih ē kiáⁿ路 ê 第 2 查某 kiáⁿ，發燒熱 bē 退，tshūa 去 hōⁿ先生看，講是寒--著，thèh 藥 á 食 kúi-ā 工，ná 來 ná siong-tiōng，kui 身軀 kiù 筋 lák-lák-tshuah，趕緊送去羅東聖母病院，sùi 檢驗出來講是小兒麻痺，tiòh-ài tsik 時 tùa 院治療。

平--a 一直央醫生講：「...tiòh 用 siōng 貴、siōng tsán ê 藥 á，該付--ê，我 lóng 付 ē 起，拜託！拜託！」；好 ka-tsài 1 禮拜後，發燒有退，人無死，m̄-kú 雙 kha 已經 kiù-kiù 伸 bē 直，tāk 工 un tiàm thô-kha tshiūⁿ 蕪薯 án-ni，m̄ 是爬 tō 是 sô。

A 文去病院看 ê 時 tsūn，平--a ná 哭 ná 講：「tsit 世人，i 無 thuh 楞 á bē suah，攏是我害--ê，...nā khah 早送--來，無 tik 確就 bē án-ni...，嗚....」tshin-tshiūⁿ 紅嬰 á teh háu，haiⁿ tsin 久 tsiah 停--落-來。

出院 ê 前 2 工，小弟 ê 喪事已經辦 kàu tshia 靈、kap 爐，差不多 beh suah，平--a in 老 pē，kám ē 操勞 ut-tsut ê 緣故，hiông-hiông piak 腦筋，聽講是大條--ê，1 聲就去--a；是講...，食 kàu 70 外，beh 死 ná 有一定--leh，生成 ē pōng--著，是早慢 niá，所以平--a kā in 老 pē ē 過身，看做是 pháiⁿ tãi tú 好積積做 1 夥，iā 無特別艱苦--著；顛倒 in 老 pē tī leh ê 時，不時偷 iap 錢 hōⁿ hit 3-ê khah m̄-tsiáⁿ 人 ê 小弟用，mā tiāⁿ-tiāⁿ 叫平--a 去清 kiáu-siàu、納酒攤，ā bat 去還茶店 á ê 查某錢...1 大拖 piⁿ būe suah ê àu 戲，bók 怪 in 2-ê 小弟 ē 哭 kah 足艱苦，kap 平--a 比--起-來，1 丈差 9 尺；tsit 聲，老 pē 死 giān-giān，būe koh 來 seh-seh 唸、烏白 ó 銀票 á，「狗蟻 tsüⁿ kha sùi 人 púe」，顛倒 thiōng 著平--a。

5、第2 小弟出去賣燒餅

兄弟 úa 食心 ē 驚，升做頭手 ñg 望 phah 拚；

鈍刀割 lán 1 擺痛，隨人討米隨人落鼎。

tàu 伙計墜落名聲，出錢賠罪全靠阿兄；

欲搬走眾人知影，疏通賊頭市場賣餅。

連 súa 2-kái 喪事，A 文 ùi 看日、買大壽、tshūe 風水、叫 sai 公、入殮，kàu 布置式場、安排 tīn 頭、hiàm khng 棺材 ê kha 手、參詳落壙 ê 時辰，攏 tshòng kah 好 sè 好 sè 一直 kàu 出山 suah，足足無 ñg 2-kò 月；平--a 足感心--ê，tiau 工 tshūe A 文去麵店 á 食暗，應該是 beh such 謝 ê 意思。

燒酒 ná lim，平--a 有 teh 怨嘆 i hit 3-ê 小弟，pîn-tūaⁿ討 thàn，koh hìng khai kah pùah，ùì 來頭城起基做製材所開始，kui tīn 就攏 beh 看 i 食穿，問 A 文講：「...你看，án-ni kám 有天良--leh？」

A 文 tiām-tiām 想 1-khùn 講：「lín 兄弟 á...，你 siōng gâu thàn 錢，m̄ úa--lí，beh úa siàng？我看...，tse kap 是 m̄ 是有良心，無 siáⁿ牽連！」

「是 án-tsúaⁿ你 kap gún 老 pē 講--ê kāng-kāng-kāng？」平--a 有 1 點 á 不服。

「Tui 老 pē 來講，tāk-ki 指頭 á kā--lueh，lóng ē 疼，ē 叫 in úa--你，tiāⁿ著有 i ê 理由。」

平--a 聽 suah 面 iu-iau lóng 無 ñn 話，tiām-tiām-á giáh 箸 ngeh 菜，kap A 文連 lim kúi-ā 杯，過 1 睷 á 久 koh 問講：「...būe 娶進前 úa--我，iáu 講 ē 過；to lóng 娶--a，kám 有道理？」

「論真講，tsit-ê 道理你 ka-kī siōng 清楚，kám ài 我講？」酒 lim 1-ē tsē，A 文講話 ke khah 好膽--起--來，敢 khioh 話 kā 平--a tú。

「好！你講...」平--a kui 面紅 kòng-kòng，jú 講 jú 大聲，強 beh 吵著 pát 桌 ê 人客。

「Lán mài siuⁿ大聲...」A 文 sái 1-ê 目色繼續講：「...khah 早你 kap 日本人合股 tī 雙溪開 liâu 柴館，後--來 koh 去基隆佔 hit 間 hō 米國 ê 飛 līng 機 khian kah 爛 kô-kô ê 製材所，koh sèh 來 khui tsit 間工廠，toh 1 遍 m̄ 是 lín 老 pē 賣山、賣田 hō 你做本--ê；你 ka-kī 想看--leh，頭前 2-kái 加減有 thàn--kúa，hit-tsūn lín 3-ê 小弟無 úa--你，你 mā 無 thèh kah 半 sián tng--去；tsit-má...，你 teh 頭城大 thio，老 pē ê 祖產 iáu-būe 分 ê tsìn 前，小弟 úa 來食穿，是有 siáⁿ m̄ 著--leh？...tse 是 lín 老父 būe 死 tsìn 前 tiāⁿ tau leh 嘴--ê teh 唸；是真？是假？摸你 ka-kī ê 心肝就知--a。」

聽 A 文講 suah，平--a koh lim kúi-nā au，坐 tiàm hia 想 tsiāⁿ 久 tsiah 開嘴講：「taⁿ，...就 tshiūⁿ 你講 ê án-ni，老 pē kah 過身--a；你看，kám 有 siáⁿ 步 thang tháu？」

「Nā 講 thèh kúa 現金分--in，你一定 m̄ 肯...」

話 tsiah 出 1 半，平--a sùi tshap 嘴：「...in ē sùi khai--去，時 kàu ē koh 來；tsit 招 pháíⁿ 用！」

「...līng-khó 分 kúa 股聲 hō in，順 súa kā in 升做大割鋸台柴 ê 頭手，加 kúa 月

給 tshiàⁿ-- in khah 直...」 「.....1--來，鈍刀割 lān 1-pái 疼，kā 分家伙 ê khang-khùe 做 1 遍解決；2--來，後過 nā 有 siáⁿ-mih kiáu-siàu、酒錢就 kap 你無 tī-tāi；kám m̄ 是 siōng 好 ê phiat 步--leh？」

「Án-ne，...是 sió-khúa 有 thong；...hō 我想 1-ē。」

RRRRRRRRRRRRRRRRRRRRRRRRRRRRRRRRRR

過 1 禮拜，平--a kā in 2-ê 小弟 hiàm 來鋸木工廠 ê 事務所，tng 所有工人 ê 面頭前，A 文 mā 有 tī 內底；照 hit 暝 lim 酒所想 ê 步 sò，講 hō ták-ê 知；...分 in 股聲、sùi 人煮食、tshiàⁿ in 做大割鋸台 ê 頭手，月給有加 kúa。

平--a 是 áu 蠻外人 niâ，tùi ka-kī ê 小弟，心肝無 hiah hiông，所以 1-ke-húe-á 攏有滿意；nā ē tsuaⁿ-á 認份、pah-piàⁿ，sùi 人討米 sùi 人落鼎，顛倒是平--a siōng 大 ê òng 望；偏偏 á tsit 2-ê 是 pháíⁿ-tê-luh koh 兼 àu-kha-siàu ê 浪蕩子，鋸無 kúi kho 柴，būe-tsing 替平--a thàn 著 siáⁿ-mih 銀票 á，龜 kha 就先 sô --出--來，惹 1-kúa 禍端，tsiah phiaⁿ hō 平--a 去 tshit kha-tshng。

Tāi 先是 sè-hàn ê 順 á，爲著 tàu 查某 tsiah 出 tã-tsi...

Tua 寮 á ê 工人，tāk-ê lóng 有家後，tiāⁿ 著是 sùi 人 ê sùi 人好；mā m̄ 知 ùi tang 時起，i kap 1-ê 工人 ê 某號做麗紅，teh 偷來暗去，燒熟 kàu bē-su kō 著黏 thi án-ni pak būe 離；in tsit 2 口灶，睏 sio 隔壁 ê 工寮，差 1-iân 枋 niâ，sùi 人 ê ang 是 m̄ 是出去外口、某是 m̄ 是無 tī--leh，耳 khang phih lueh 聽就知--a；nā 準有人 tng--來，趕緊褲 láng--leh，liam-kha ùi 後尾門 suan，鬼 mā m̄ 知！

Hit 工是清明日，順 á in 某講 beh 去礁溪 ê 後頭厝，tshūe in 兄哥 thèh 會 á 錢，透早坐頭班 ê 公路局 tng--去；tú 好麗紅 in ang mā 坐頭 tsūa ê 火車 beh 去雙溪車頭前頂坪 á 埔 phùà 墓草，tsing 差是半點鐘 niā-niā；麗紅 in ang mih 件款好，hāⁿ 過戶 tīng to 無 5 分鐘，順 á sùi ùi 後尾門 kiáⁿ kha kàu；2-ê 人 kán-ná tsin hah ê 款，phīng tī 門邊 būe 講著話就 moh ân-ân 一直 tsim，4-ki 手，頂 ē 起起落落 so bē suah；sua--落--去 liú-á ná tháu 褲 ná thng，奶 kah-á、內衫 sì-kè tàn，peh tsiūⁿ 眠床頂就 hut kah haiⁿ-haiⁿ-tshan。

另外 tsit 頭，麗紅 in ang būe kàu 月台，tsiah 想著有 tsah 掃刀，無 tsah hit-ki tshāi tī 後尾門邊 ê 刀柄，是 beh án-tsúaⁿ phùà--leh？看講火車 iáu 有 10 分 tsiah 來，趕緊用走--ê，tsōng ùi 後尾門 tng--來。

M̄ 知是房間內 hit 2-ê khè 兄伙計 pìⁿ kah tng thiong，無去斟酌外口 ê kha 步聲；áh 是麗紅 in ang 耳 khang 特別利，有感覺著不 tùi ê 所在，neh kha 尾 liam úa 來門邊...；mài 聽 iáu 好...，tsik 時 1-káng hông 火 tùi 頭殼頂 tshing--起--來，m̄ 管三七二十一...，sa 門邊 ê 刀柄起來 tàu，伸 kha tshè 力 ùi 門 kā tsám--去，「Phiáng」1-ē，門扇 siàng 入--去房間內，koh 「Pòng！」1 聲 tng 落來 thô-kha....。

眠床頂 hit 2-tsiah 身軀大 sè 粒汗，舞 kah tâm-lok-lok ê 白肉豬 á，hiông-hiông 去 hō 火山爆發驚 1-ē，9-tsàn ê 金剛體險險 á 無--去，同齊翻身 kiu 入去眠床 ê 內角，kha 手肉 lāk-lāk-tshuah，大嘴開開強 beh 變 é-káu。

Thō 粉 kap 蜘蛛絲 ing-phōng-phōng ê 茫霧中，khiā 1-ê 關刀橫 tī 胸前，面 tshuiⁿ

pháiⁿ-tshing-tshing ê 查甫人，bē-su liáh 狂 ê 張飛 hit 1 樣；順 á tsiáⁿ緊就回魂--tng-來，beh liòng 身 tshun 長手去 ni 衫來穿，m̄-koh 利劍劍 ê 掃刀，kha 手 koh-khah mé，閃 1-ē 光就 kā ngiauh 落去門邊 ê thō-kha-tau，嘴 ná tshoh：「kán lín 娘 ê 老 tsi-bai...，hō lín-pē tsang 著--a-hohⁿ，你 koh úa 來--kòh！....」

「好...好...，我 mài úa...」面 á lik 色，雙手合起來一直拜託，tìm 頭....。

「Sái lín-né--leh，看你 jūa tsio-tiō；lín-pē kā 你 ê lān-tsiáu 割落來 tshī 後壁 ê 火雞！」

順 á 強 beh khàu--出來，跪 teh 眠床頂身軀一直 tshuah：「mài--lah，mài--lah，後 pái 我絕對 m̄ 敢--a」

「後 pái？....lín-pē tsiah beh 看你有 kúi 枝 lān-tsiáu！」

Tsit-ê 過程 àn 頭 kàu 尾，看有 1 分鐘--無；tù tī 工寮內 úa beh 有 10 口灶 ê gín-á 大細、老--ê 少年--ê；攏 hō 透早 ê 雷公 sih-nah，吵 kah 精神--起-來；有目 tsiu 金 siak-siak 探頭看是 toh 1 間 teh 做風 thai--ê，iā 有耳 khang tshun 長長 kiáⁿ úa 去門前 sūi 間 á 聽--ê，mā 有人 kan-taⁿ 穿內 kah-á teh huah kah 大細聲....。

Thing 候麗紅 in ang，tu 掃刀尾 kā 前門撥--開，koh hiat 1 堆衫 á 褲出來門外 ê 時 tsūn，tāk-ê tsiah 知是 toh 1 間 teh 滾 liòng，tsiáⁿ 百 lúi 目睷同齊 tsīn tùi 眠床頂 hit 2-ê ká-ná tsin 驚 hiáⁿ，kiu tī 內勢 koh 赤褲 lān ê 查甫、查某 hia--去；1-khùn-á 久，人 ná 圍 ná tsē，lóng teh kí-kí-tùh-tùh，有大人 teh huah：「gín-á 閃！邊 á 頭--去！」，iā 有續續 teh hūe 講：「i 就是...」，「in khah ē hiah 好膽...」，「ing 該，死--好.....」，一直 kàu 平--a 去 hông hiām--來。

是利劍劍 ê 掃刀 tsáh leh 眠牀前，順 á kap 麗紅連 khùi mā m̄ 敢喘 siuⁿ 大聲，thài ē 敢去 khioh 衫穿--leh！是麗紅 in ang kā 看鬧熱 ê 安 á 講：「hiām lín 大--ê（平--a）來！nā 無...，lín-pē 就 beh kā liō--落-去！」

過 1-khùn-á 久，平--a 目 tsiu ham-ham 穿暎衫暎褲，3-huah 做 2-huah，ná tsōng 遠遠就 ná huah：「sió 等--leh！....sió 等--leh！m̄-thang tshóng-pōng--ō！」喘 kah 強 beh 無 khùi piàⁿ kàu 位講：「....是 gún 順 á m̄-tiōh，....我 ē 還你 1-ê 公道，你先放 i 去好--無？」雙手 tah teh 胸坎，bē 輸心臟 beh tiām--去 hit 1 樣。

平--a 看麗紅 in ang tìm 頭...；tsik 時面 tshiuⁿ tng 橫，tù 順 á huah 講：「iáu m̄ 緊去穿衫....，是 beh tiàm tsia sià-si-tsing--hioh！」

2-ê 人頭殼 lê-lê 面 á 紅紅，4-lúi 驚惶 ê 目 tsiu，顧煩惱 hit-ki 掃刀尾，tī 光天白日眾人 ê 面頭前，tsiah 無 teh 管是 m̄ 是 tshiah kha-tshng，趕緊 ùi 棉被底 tiō--起-來，衫 hiáⁿ--leh，無 khà 穿就 suan--a。

路尾 á 是 A 文去 kap 麗紅 in-ang 講情...，條件是順 á ài tshûan 銀票 á 出來消災，nā 無，人 beh kā 告；tshiâu kò 外月，tsiah tshik 好 sè。

有人講是順 á 目屎流目屎滴去跪平--a thèh 2 萬 khō，差不多是 i 20-kò 月工資 ê 錢做賠罪金，tāi-tsì tsiah suah--去；m̄-koh，i 隔工就 ùi 工寮搬--出-去-a。後--來，平--a 有 giá i ê 勢頭，叫 A 文出面去派出所疏通，tī 菜市 á 口替 i tshūe 1-tah 賣燒餅 ê 擔 á 位，hō in kui 家口 á 換食，khai jūa tsē 銀票 á，A 文講 i bē 記--a，大概是 1-2

萬 kho ê 款。

6、內賊

庫存便料好 piⁿ弄，安弟暗 khàm 幾 ā 冬；
鴨卵密密嘛有縫，爲著支票來 piak 空。
老母疼囡做好人，阿兄 tsik 時 kā 賊放；
後來 puah 輸欠錢項，這擺真正著 làng 港。

Kui 家 húa-á kāng 口灶 teh 食穿，m̄管 pē-kiáⁿ、ang 某 ah 是兄弟姐妹，mih-kiáⁿ nā hō ài ê 人 thèh 走，無論是用--去、khai--去、食掉、tng 掉 ah 是 puah 輸--去，就準講是銀票 á、金 ámā 攏 kāng 款；hūaⁿ手頭 ê 人 bē-sái 講 i 是賊偷，mā bē 送 hō 官廳去辦，kik-ke 是罵罵、phah-phah--leh，就放 i 去；tùi 安 á 偷賣料 á ê tãi-tsi...，平--a 就是 án-ni 做。

Tú 著有人客來注文柴料，平--a lóng ē 寫 1 張明細交 hō 安 á 去發落；siōng 通用 ê 便料 á，平時 to 有 tún--kúa，寸尺 khah 特別--ê，tsiah 有動鋸台，liáu 新--ê，總 tshúan 好 liáu 後 khioh 做 1 堆，安 á ē 用 3-lián 車，拖去 hō 人客點收；tiāⁿ-tiāⁿ teh 送貨 ê 時 tsūn，若 pōng 著月初，ē-sái 領頂月日貨款 ê 時，橫直是支票 iā m̄ 是現金，ē huan 咐 i 同齊 kā 貨款領--tng-來，tshiāng-tsāi án-ni teh 做，m̄-bat 有 tng-tāⁿ--過。

有 1 工，1 間營造廠 ê 出納，khà 電話講有 bó 1 張 tshiu-hing ê 金額 ke 開 1000-kho，beh 討 tng 去改...；朋 á 講：「請你 sió 等 1-ē，我 tshūe 看--leh」電話 khua 落--去桌頂，掀 siào 簿斟酌看 1 睷...。

目頭結結，對無 tsit 條 siào，趕緊 koh kā 電話 giâ 起來講：「tsin pháⁿ-sè；gún 小姐 tú 好 kiáⁿ開，liām-mih tng--來，tsiah 叫 i khà--過，好--無？」

平--a 搬明細簿出來 liáh siào，khah 對 to 對無 hit 張 tshiu-hing，koh giâ 電話起來 khà：「...無 tsit 張--neh，kám ē 你看 m̄ 著--去？」

Hit-ping ê 會計 sūi in 講「昨 hng，安 á tsiah 領 niá，....」

「Tse 我知；m̄-koh 我有 tùi--過，金額是 1 萬 4 千 5，明細 kap siào 目攏有....」

「M̄ 是 tsit 張--lah，是另外 1 張 5 千 5--ê-lah！」

「咦...；án-ni hioh，....」聽 kàu tsia，平--a 心肝內已經有 teh phah 算--loh，tsik 時接話講「...好，我 sūi 叫人 thèh tng 去改！」

支票 tī 安 á hia，thài 有法度 sūi 改--leh！爲著家族 á ê 面子，koh 無 ài kā 安 á phah tshìⁿ驚，想講 hiàm 小姐 tsah 1000-kho 去還對方，kā tsit 件 tãi-tsi 先安 tah--落--來 khah 直；beh thng-hāu 總查 hō 清 liáu 後，tsiah 來修理 tsit-kho m̄-tsiāⁿ-kiáⁿ。

RRRRRRRRRRRRRRRRRRRR

平--a phah 派 A 文去營造廠，抄所有用 tshiu-hing 付款 ê 明細 tng 來 kap 公司 ê 餘 siào 簿 á 對，koh 暗靜拜託銀行經理提供安 á 寄金簿 á 出入錢項 ê 抄本，3 頭 2 面 ún-ún-á khng 2~3 點鐘，去 liáh 著有 tsing-tsha ê 金額，攏 sūi 件 á tiâu tī i ê 口座內底，一清二楚，bē 走閃--tit。

Tsit 內面，A 文去 tshūe 著所有安 á σ-se ê 柴料攏是寸尺 siōng 通用 ê 5 分枋（算

坪 ê)、寸 2 桷 á、寸半桷(桷 á 算材--ê), mē 角就是出 tī tsia; nā beh 講 hō 清, tiòh-ài àn 頭講起...。

柴 kho 是圓 ê, tsüⁿ 鋸台無論 án-tsúaⁿ 去 liáu、去裁, 準講鋸--落-來 ê 邊材有 jú 細 liáu, mā 絕對 bē sùi kā tàn 去做廢料, ē 加減 khioh 1-kúa 來鋸做 khah 細、khah èh, 平時 siōng 有銷、siōng 通用 ê 寸尺, tsiah bē phah-sng; koh khioh 來鋸 ê 邊材原本就 m̄ 是 tsin 4 正, ē-tàng liáu 做 siáⁿ-mih 寸尺、長度 kap ki 數 lóng bē àn--tit, 長長短短、有粗有幼 thiáp-thiáp 做 1 堆, 有 ing tsiah 來 khing; 鋸柴 ê 工人, nā ē 去 khioh tsiah-ê 邊材來鋸, 已經 tsin ka-tsai--a, i thài ē 去算 toh 1 種 kúi-ki、kúi-tè--leh; ah 若 beh ták 日點庫存、算 ki 數, 真正無 hit 號性命去點、去 hiau, 做工 á mā m̄ 肯; 所以, siōng tong 銷 ê 便料, 庫存就 m̄ 是 tsin 清楚, o-se 來賣, siáng ē 知--leh? án-ni, tsiah hō 安 á 有 thang piⁿ 鬼 piⁿ 怪。

若 m̄ 是營造廠講 tshiú-hing beh 改, tsit 種內賊 tiang 時 á tsiah ē 破事, tsiaⁿ oh 去 ioh; ah-nā 安 á 領貨款 ê 時, 有斟酌著錢額加--出-來, 趕緊還--人, 無 tik 確 bē piak-khang; 總--是, tiāⁿ-tiāⁿ kiāⁿ 暗路, 就 ē 去 tú 著鬼!

安 á sió 面神, bē 堪 leh 講白賊, hō 平--a hiám 去問無 2 句, am 頸 á 筋總紅、頭殼 lê-lê, 總 làu-làu--出-來-a, 講 kah beh tsheh-khùi; 平--a 目眉毛 ngiauh kuan, 烏仁 tng 圓, 出大聲 ná tshoh: 「sái lín 娘 á--lih-a, 你 tsit-ê 無人情狗, lín-pē....」, 出手 ná tui 安 á ê 嘴 phúe...., 1 聲「Phiak!」kā kuat--落-去。

Siak 落--來椅 á kha ê 安 á, 目 kho 紅紅強 beh 喉 tīⁿ ê 時, 平--a in 老母 tiàm 房間聽著廳 ê 有人 teh kàn 公 tùh 媽, koh 是平--a ê 聲, ká-ná teh 冤家, 趕緊 tsōng--出-來, 1-ê 面 sùi lùah--落-來講: 「我做老母 hiah-nī 久, m̄-bat 起 kha 動手 phah kiáⁿ--過; m̄-koh, mā 免你來 kà-si-i,」

「A 母...., 安 á i....,」

話 tsiah 出 1 半, 老母 sùi in 講: 「tiām--去!」目 tsiu 看 tui 安 á hia--去講: 「你先 lueh!」, 頭 uat 過來 huan 耐平--a: 「有 siáⁿ-mih 話, liám-mih tsiah 講....」

安 á tshin-tshiūⁿ 衰尾道人, ùi 老母 ê kha-tsiah 後先 suan, 平--a tiām-tiām 無 kā 擋。

Tsit-kái 是安 á 好狗運, 有人 thang ūi,; m̄-koh, 半冬後, 1 tīn a-sa-put-luh ê lô-mua thèh 借條來討 kiáu-siàu ê 時 tsūn, 就無 thang hiah 好食暱--a。

平--a tsit-kái kà 乖--a, ná kap 老母參詳...., beh 替安 á 還 tsit 條爛 siàu, 條件是 i ài tsik 時搬出去 ka-kī 討食; 暗靜 á ná 央 1-ê 平時 kap i tsin 有交陪 ê 賊頭(警察) 去 so, 尾手 á phah 5 折, kā tsit 張借條燒--掉; kāng hit 1 日, 安 á tshin-tshiūⁿ iap 尾 á 狗 án-ni ùi 後尾門搬走, 無 koh tò tng--來; 聽講是去宜蘭三星 hông tshiàⁿ tshò 柴, in 老母一直 kàu 過身 ê tsin 前, ták 月日 lóng 有偷 iap 錢, hō i sio 添厝內 ê 所費。

7、娶第 3 某

生苦病痛無 ān 定, 透早才開花隨謝;

純情腰 á 無 súi 命，留囡放翁做伊行。
 平兄攔娶心驚驚，假意寄附問王爺；
 原本意愛是玉姐，牽拖籤詩烏白寫。

話 koh 講 tng 來 i ê 第 2 某腰 á...；18 歲嫁 hō 平--a 做後 siū，tī 生大漢查某囡瑞
 苓 á ê 時，m̄ 知 siáⁿ緣故，去 ùe 著 hai-khe-khak-kuh (肺癆)，lóng 有 teh 看醫生食藥
 á，人看--起-來 sán 抽 sán 抽，面肉白蒼蒼，講話輕聲細 sueh；頭尾連 súa 生 3-ê
 查甫、2-ê 查某 iáu 好好；無 tiuⁿ無 tī 安 á 搬走 hit 冬，beh 過年 ê tsin 前，聽講是寒
 --著，嗽足久醫 būe 好 sè，siong 重 kàu 送去基隆病院，mā 無 tshái 手；tsiah 32 歲
 nià，放 5-ê gín-á，siōng 細--ê 威煌 3 歲 tú 斷奶，就做 i 去--a，hō 平--a m̄ 甘 kah 強 beh
 tùe--去，ut-tsut tsiaⁿ久無心情 thang 去管顧生理 ê tǎi-tsi。

工廠 ê 人攏 teh hán...，平--a 心肝艱苦是 teh 做戲，tshiūⁿ i hiah tshi-ko ê 人，thài
 ē-sái 無某？所以，i ē koh 娶。總--是，1-ê 41 歲 ê 頭家，有錢、koh 有事業 teh 做，
 hàn-tsháu 是有 khah 大 kho tām-pòh-á，點燈 á 火 mā tshūe 無 tsiah tsán ê 查甫人，早
 就有人 teh siào 想--a；siōng hìng--ê 是街 á 底 1-kúa tsáp 嘴狗 kha-tshng ê ing 人，不時
 tsah 相片來 lih-lih-lo-lo，戶 tīng 踏 kah beh ui--去，būe 嫁--ê、死 ang --ê 拖 leh 一直
 報，看講有牽豬哥錢 thang thàn--無。

王 聖 漳 開	柑 腳
福祿自來袂著災 若有好禮顧全家 勸君老實做買賣 食穿原本無佬濟	第五首 甲丙(中吉)
愛謹慎 病可治 訟和吉	聖 意
莫憂疑 娶不宜 產猶遲	問名利 自有時

喪事辦 suah 無 jūa 久，老母專工 tng 去聖王公廟問未來，mā 有意思 beh 替平--a 解 eh 兼消災；先 jīm 荷包 á liōng-siōng 開，giáh 香 kúan kah 過日眉，身軀彎 khiau khok-khok 拜，籤筒 moh 起來頂 ē haiⁿ，kā thóng 頭 hit-ki 抽--起--來，籤詩字句 bue 輸 ioh 謎猜，麻煩廟公讀 hō i 知；雖 bóng 無好 ā 無 bái, koh 驚平--a m̄ 信 tsit-lō 籤詩 tã, tsah tng 來 hō i kā-ki 解。

Bue 讀籤詩 ē tsin 前，平--a 先問 in 老母，到底寄附開 kúi 圓？kám 有新栽樹 á teh 廟邊？籤詩 ná ping 面 ná piⁿ，ná tshiuⁿ kang 嘴抹鹽 sīⁿ，kàn-kiāu 「娶不宜」tsit 3 字，bē 輸利箭射過後腦 kng 過鼻；罵廟公 tui i 無尊存，嫌做籤詩--ē 無學問，怨聖王公 gâu khioh 恨，嘴 nūa 拖 leh 一直噴；老母氣 kah 人起 tsùn，起身 giú 開房門 hit 時 tsūn，講 i 人 siān 想 beh 睏，bē-giàn kah siáu--ē koh 討論。

論真講，是平--a ka-kī hah 娶某，早就相著 l-ê íng 過 bat 來去 ē 中年查某，in kui 家 lóng 是 teh 做工 ē sán 門戶，tù 羅東姓吳；i hiàm 老母去問神明是有企圖，nā 準抽籤有 siàⁿ 就 beh 叫 hm̄ 人先鋪路，thíng 好 tsik 時來起 kò；料 bē kàu tsit 張籤詩，有「娶不宜」ē 字句寫 kah 明明明，無 tik 確 tsin 正是聖王公 ē 旨意，mā m̄ 是廟公 tiau 工來 tshòng-tī，平--a tsit 款怨 tshēh 實在無道理；koh 聽著寄附 l-kái kúi nā 千，心頭 tsiah 是 gīng，tsin 想 beh tiò 去柑腳 liáh 廟公來 tsing，顧 bē 著老母是 m̄ 是 khiā 面頭前，照常現原形。

跳年開春，真正不出 tàk-ê 所料，kā 第 3 某（號做 A 玉）娶入門，聘金是送 in tau 1 間羅東火車頭前 úa 路邊 ē 3-tsàn 樓 á，名過好 liáu 後，A 玉 in 老 pē koh 翻第 4 tsàn，改修裝潢做旅館，是 m̄ 是平--a 好人做到底 kā 出錢，無人知；koh 引妻舅 á 入來 òh 鋸柴；小妹 A 梅來事務所，做 tò 茶、聽電話 ē 雜 tshe-á sit。

8、一線二針

姨 á 姊夫偷來暗去，摸空 tshūe 縫契兄伙計；

一人一項無禁無忌，食飽閒閒罔弄罔試。

歇晝 hiáu 婢招 lān piⁿ tsi，樓梯相閃破事一時；

耳鉤涼涼使人 giâu 疑，好夢快醒翻身隨辭。

A 玉入門來--kàu--tē，大大方方 tshāi tī siào 櫃前，看 ē 出--來，錢銀出入 i teh lāk，手內不時 sa l-kūaⁿ 鎖匙 teh haiⁿ，明明就是頭家娘 ē pān-sè，hō 人 him 羨 kah！

Koh 無 jūa 久，平--a 去 tàu 著 A 梅。Íng-íng nā 有 làng-phāng，就 1 人出 1 項，做伙去輕鬆；kiⁿ nā 出門去 pát tah 收錢，áh 是買柴，in 某 A 玉 ài 顧門市 ē siào 櫃，仙 kiāⁿ to bē khui kha，thài ē 知 iáⁿ tsit 2-ê 姨 á、姐夫 teh piⁿ siáⁿ báng--leh；後--來 jú 食 ju 鹹，有 tang 時 á 平--a 去樓頂睏中 tàu，放 A 玉 ka-kī l-ê teh 樓 kha ē 時 tsūn，A 梅 mā ē tiò 去 tshūe 平--a，心 sik l-ē...。

適合守舊	不可私貪	但存忠直	盡心
求兩平	會曉孝悌	忠信做根本	福祿自
然來對應	抑若硬求	攔強取	恐驚禍端
來無歇	占者照道理	守本份則吉	

頭起先，A 梅 táuh-táuh-á ài súi，衫 jú 來 jú tsē，ke 足 gâu 粧 tháⁿ，A 玉 kioh 是 in 小妹外口另外有查甫，mā ē kā khue 東 khue 西...，姐妹 á 感情 iáu bē bái；án-ni 拖過 2~3 冬，攏無人知 iáⁿ。有 1 日，tú 好是 1-ê 大風 thai liáu 後 ê 第 2 工；ù 透早就無 ìng tshih-tshih ê 門市，sing-lí 好 kah ē 驚--人，庫存掃 kah 光光光以外，ê 柴 pang-á，鋸 bē 赴 thang 賣--人；過 tàu liáu，人客有較 lang--去，無 tiuⁿ無 tí m̄ 知 siáⁿ-mih 緣故，A 玉人無爽快，頭殼 gông-gông koh beh 吐 á beh 吐，去 3 樓 hiàm tng leh 歇 tàu ê 平--a 落來替--i；是 m̄ 是 peh 樓梯 ê kha 步聲 siuⁿ tân，hō A 梅趕緊 piáⁿ leh lōng...，hām A 玉 tī 3 樓 ê 樓梯頭險 á sio khok。

實在講，ka-kī ê 小妹 tàk 工 teh 樓 kha、樓頂出出入入，原本無 siáⁿ thang 怪奇，相閃身 koh 有對嘴借問 1-ē，tsiah 2~3 秒 niâ，A 玉人 siān，無 khà 去想 siuⁿ tsē，足大 huah tsōng 入去 in ang-á 某 ê 房間...；外衫 thng 好藏入去被內，想 beh kap 平--a sai-nai 2 句 á，iáu bē 出嘴 ê 時....，kha 脊 phiaⁿ 有先 kháp 著 1 絲 á tiam-tiam koh 涼涼，伸手去摸，...是 1-kha tsiaⁿ 面熟 ê 金耳鉤，尾 liu ê 墜 á 是 1 蕊玉 á 刻 ê 梅花，是 i tiau 工去金 á 店 phah 來 hō 阿梅做生日--ê，有 tsin 深 ê 意思；i ka-kī teh 心肝內 giâu 疑，頭殼內 tng-sèh tsiah 1 秒 niâ，就想--著-a。

Tsit 工 ē-po，kui-ê 工廠 hioh 暈，門市 ê 店口關門 tshuaⁿ 戶，10 外年來 m̄-bat hō 工人 tsiah 好 khang--過；有人聽著頭家 kap 頭家娘 teh 樓頂 kháp 鼎 kháp 灶，hāu-hia、飯 lē khin-khin-khiang-khiang，kàu 半暝 tsiah ún-ún-á tiām--去。隔 tng 工，A 梅 m̄ 知 bih 去 toh 藏，聽講是 tng 去羅東 in 後頭厝，無 beh koh 來--lō。

舞 tsit 齣大戲 suah，平--a 有 khah 顧家 tām-pòh-á，罕 leh koh 出門，無 tshiuⁿ íng 過 án-ni teh pha-pha 走；koh 過半冬，A 玉第 1-kái 有身，1-khian 肚 jú 來 jú 大，uan-ná tàk 日照 khí-kang teh 做 i ê 頭家娘；無 jūa 久，生著 1 粒 lān-pha，tse 是平--a ê 第 4-ê hāu-seⁿ，頭前 iáu 有 3-ê 查甫、2-ê 查某，攏是第 2 某——腰 á 生--ê；koh-khah tsin 前 ê 大某，有生 1-ê，3 歲就 liáh 去種--a，算算--leh 總 á 共 á 生 7-káiⁿ，扣掉死--去-ê，iáu 有 6-ê。

9、áu 蠻 ê 生理人

雪子躡身做奴才，不時攏知 áu 蠻 tǎi；
 拄著平兄真正害，烏白 tshi-ko 兼 iau-sái。
 恐嚇欲報阿玉知，2 項 tú-khí 免攔來；
 父母仇深冤 oh 解，路尾 kui 心去種菜。

開營造廠 ê 甲寅 á，性地 tiâu-tit koh tshin-tshái，所以 i tī 地方 ê 人緣好，交陪 mā tsiaⁿ 闊，官廳、學校 ê khang-khùe bāu bē tsió，1 sì-kè 攏有 sit-thâu teh 做，加減 ē 來除 1-kúa 模 pang、起厝 ê 柴料，m̄ 是桷 á、枋 á 就是圓杉 á；過月 tsiah 算 1-kái siào。

有 1 工，甲寅 á thèh 頂月日 ê siào 單來：「平--a...，9--月是 3 萬 2 千 5，m̄-koh 我昨 hng 開 hō 你--ê 是 3 萬 5 千 2...，單 iáu tī tsia；你 beh 算--無？」

「Kám ē án-ne？我算看--leh？」平--a ná khîng siào，ná tiak 算盤，嘴 ná 唸...。1-khùn-á 久 liáu 後，平--a sùi kā 甲寅 á 回失禮講：「pháiⁿ-sè！是 gún m̄-tióh！」

tùe 手 kā 差額還--i, 2-ê 人有講有笑, iā 無起冤家。

Koh 有 1-kái, 有人來買 5 分厚 ê 杉 á 枋, 人客問講:「總共 kúi 圓?」

平--a 應講:「1 萬 6 千 4。」

可能是 teh 趕時間, 錢付 liáu 就走--a。

過差不多 5 分鐘, 會計小姐阿雪 á kā 平--a 講:「頭家! lán kàng 算 khah 加--a! 是 1 萬 4 千 6 tsiah tiòh!」

平--a 目頭結 úa--來, sùi koh 假仙 tng 笑講:「我算看--leh, ...koh 有 iáⁿ算 khah 加... , 人 mā 走--a; án-ne--lah, nā 有翻頭 koh 來討, lán tsiah 還--i!」。聽講... , 無人 tng 來討... , 公司 ê siàu 簿, 登記現金 ê 收入是 14600, m̄ 是 16400。

Tsit kho 會計小姐是工廠 1-ê 工人 ê 查某 kiáⁿ, tsiah 國民學校出業 niá, 有 thang tiàm tsia 食 tsit 種世間上軟 ê 頭路, 做 é-káu to bē 赴--a, thài 有 hit 號膽去 iah-khang--leh?

是後--來, 經過 7~8 冬, 雪 á súi kán-ná 1-lúí 花, 1 身軀該 naih、該 phòng--ê i 攏有; hit-tsūn, 莫講平--a tsit-kho 老猴 giàn kah 強 beh kā thiah 食落腹, 足 tsē 來 tsih-tsiap 生理 ê 少年家, mā kui 日來 tsia teh phiⁿ-sô bē suah; tse iáu 無 táⁿ--kín, siōng 害--ê 是平--a 不時 tshūe-khang-tshūe-phāng beh 招雪 á 出去收 siàu、買柴。

有 1-kái 去外口 tng 來 liáu 後, 雪 á ná khàu ná tâu in pâ:「人... , bē ài koh 上班--a!」

「是 m̄ 是平--a kāng--你?」

「人 kap i 去大里簡收 siàu, tī 小路行 ê 時 tsūn, i 烏白 lām-sám 來...」雪 á 無 koh háu, ûn-ûn-á kā tãi-tsi 講--出來。

「有 án-tsúaⁿ--無?」

「是無 án-tsúaⁿ--lah, 我一直 kā i ê 手 púe 走, koh kā 講我有意愛 ê 人--a, 你 m̄-thang 烏白來...。」

「Ah i án-tsúaⁿ in--你?」

「免講, 人 mā 知...; 就是借--lán-ê 講 beh 討--tng-去...; koh tsiaⁿ phiáⁿ kā 我講... , nā 後過 koh kāng 款 án-ni, 叫我 tng 去食 ka-kī!」

「Kán! i kah án-ni púah 明--ê, 我 ē kap i 算, ...; 明 á 再你 mài 去。」

7 冬前 kā 平--a 借錢來起厝, hit-tsūn 有明 ho, 雪 á ài tiàm tsia 泡茶、piàⁿ掃兼記 siàu 做 kàu 20 歲就 tú-khí, 雖 bóng iáu 差 2~3 月日 niá, m̄-koh 昨 hng ê tãi-tsi hō in 老 pē 看講平--a ē jú 來 jú 豬哥, 雪 á 緊早慢失身, kui-khì 心肝 liáh 坦橫, 叫 i tiàm 厝 hioh 1-tsām-á。

隔工 i 去工廠, kā 平--a kiú 去巷 á 尾, 講 in 雪 á beh 辭頭路, 平--a 講:「...iáu 差 2-kò 半月--neh?」

「2-kò 半月? ...án-ni 好! 我 beh kā 昨 hng ê tãi-tsi 講 hō A 玉知!」

平--a kui-ê 面反青講:「ah 無, 你 phah 算 beh án-tsúaⁿ--leh?」

「無 beh án--tsúaⁿ, kā 借條還--我!」

平--a 面 lik 色 tò 退 1 步:「斯當時 lán 有明 ho--neh? 期限 to bue kàu, thài ē hiah 小人--leh! nā 無, 你 kā 錢還--我!」

「還--你？beh 還 jūa-tsē？」

「6...萬...。」平--a 1 字 1 字講 kah tsiāⁿ明。

「...做 6~7 冬，10 分 tshun 無 1 分 ê 時間，koh tiòh 還全額，你 iáu 有天良--無？」
平--a 有想講...，話 nā tǎh ngē，恐驚 ē piak-khang，tsiah 落軟講：「你 kah 講 10 分 1 分，算 6 千就好；ah 無，叫 i koh 做 2-kò 半月 mā ē-sái！」

「我 bē ài tiām tsia kap 你 tshuah 嘴齒--a，你 kā 雪 á siau-mô ê tǎi-tsi thèh 來換 tsit 2-kò 半月算；借條還--我，我就 mài kā A 玉講；beh.來，m.thài！」

平--a lān-pha 去 hō椅 á phāng 夾--著，無 in 好 bē suah；tsuaⁿ-á 雪 á 免 koh 來上班，in 老 pē kā 借條討--tng-來，原在做 i 鋸柴 ê khang-khùe，所有 íng 過欠平 á ê 人情 mā m免還--a。

後--來，是雪 á ka-kī kǎu 話，tī tshûan beh 嫁--人 ê tsin 前，講 hō in ang 知。

In ang m知是醋桶 tshia tó--去，áh 是 gē-siáu 起 tǔh-lān，l 四 kè 去宣傳講平--a kap 人做生理 tsin áu 蠻，tsiāⁿ tsiáp 用 hit 款土匪 á 步，搶人客 ê 現金，大 sè 條錢 mí-nūa khing，in 雪 á lóng tèⁿ tiām-tiām 無講。

結婚過 1 月日 liáu 後，雪--á in 老 pē kap 老母就 tng 去頂雙溪內山蛇 á 崙種蕃薯--a；聽講，...是 A 玉去聖王公廟 pùah-pue，tsiah 知 iáⁿ是阿雪 á in 老 pē teh 外口講 in 平--a ê pháíⁿ話；tse...，是 m 是神明真正 án-ne teh 指示，iáh 是平--a giáh 聖王公 ê khùi 口 kā i 辭頭路，lán 就無 tsin 清楚；論真講，應該是平--a 見 siào tng siū 氣，借 A 玉 ê 嘴，報 tsit-ê niáu 鼠 á 冤。

10、豬腳 kho

序大有教示，欠肉真 iàn 氣，至少嘛有魚，爽快無地比；
大 kho 害著伊，腳目先疼起，頭擺看西醫，全款 hiah 鐵齒；
阿明報藥試，有效暗歡喜，騙痛瞞一時，險險烏有去。
攔換洗腰子，tng 厝坐輪椅，丈人 m bat 字，使弄換 pát 味；
包醫定規矩，洗 ê 莫停止，頭 hín 亂主意，註該為病死；
掠準無 tǎi-tsi，送到台大院，昏迷 tshun 氣絲，這聲 bē 赴飼。

M知 siáng kā 平 á 講食 kha 補 kha ê 道理 liáu 後，A 玉 tàk 工攏 ē 買前 kha ê tsô-kho tng 來 khòng 豆油 kún hō 爛爛，l-khian l-khian 紅 gē 紅 gē，kan-taⁿ鼻著 tō 強 beh 流 nūa，bók 怪平--a 3 頓拖 leh 一直 hàu，o-ló kàu ē tak 舌。

Hit ê 時代，3 頓有肉 thang 食，nā m 是好額人，thài 有 hit 號命--leh！平--a in tau seⁿ本是地主，有免 khùi 力 ê 租佃 teh 收，ù 細 hàn 就食好做 khin-khó，伸長手就有錢 thang khai，tsiāⁿ實比 pát 人好過 tsē--a；tsit-tsūn，i ka-kī 分家出來做生理，靠 in 祖公 á tsit tè kúe-tshè hō i 做本，ûn-ûn-á núa、守守 á 做，úa beh 10 外冬，tiāⁿ著 thàn kah 嘴笑目笑。

人 nā 有 2-sián á 錢 teh 褲袋 á ngiau，就 ē hiau-pai、âng 聲，不時聽 i teh 屁講食 jūa tsán、穿 jūa 好，意思 i tsiāⁿ gâu，比 in 老 pē、阿公 koh-khah khiàng，是肩胛頭無生翅 niá，nā 有，i uan-ná ē 飛起 lih 天頂 hō 眾人看，án-né 就知 iáⁿ i hit tsūn ê

tshiaⁿ-iāⁿ。魚魚肉肉m̄是 ù i tsiah 有--ê, in 老 pē、阿公 ê 時 tsūn 就 teh 番 á 坑開 kám-á 店兼 thài 豬，嘴齒縫 tiāⁿ-tiāⁿ seh kàu 全肉 iù-á, ngiauh kah bē-tit 離；平--a 少年 ê 時 siōng hìng hàu hit-lō tú 好 sáh 熟 ê 三層 á 肉 kap 豬 kha, 出門隨身所 tsah ê 便當盒 á, 白飯是 1 嘴 á, 攏 hō tīng-tīng-tháh-tháh ê 豬 kha 滷卵 khàm--leh, in 老 pē bat 展講：「桌頂 nā 無肉，就是無菜；tsah 便當 mā 是 sio siāng！」 tsit 句話是實--ê, m̄-koh tián 風神 tsiah 是 in pē-á-kiáⁿ ê 本意。

平--a tsit kùi 冬 hàu liáu siuⁿ好, hō i ê 腰 jú 來 jú 粗, 1-khian 腹肚 tshin-tshiūⁿ水櫃 hiah 圓, 頭殼頂禿 1 半, sīng in 老 pē hit 形；講著話 mā siàⁿ kah 死無人, 1-si-kè 展 i 是 bú-tùn koh 粗勇, m̄是肥軟兼 hām-pū。

有 1 工, i kā A 玉講：「我最近 kha 目 á, 暗時 ē 抽疼, 是 m̄是來去 hōng 看--leh？」

專工去 kàu 病院, 醫生看 i hiah 大 tshài, 先 pōng 血壓才量 jūa lò、jūa 重, 問 1-kúa 平時 ê 食 mih kap 食量 liáu 後, 講 i 血壓 siuⁿ kúan、血 lò, 肥肉、豬 kha kap 卵 ài 禁, bē-sái koh iau-sái--落-去, nā 無, kha ē bē-kiáⁿ。

平--a tsiáⁿ鐵齒, tsiah 無 teh 信 táu, kā A 玉講：「騙 siáu--ê！肥肉 tsió-khueh 人 teh 食；pát 人 bē, 是 án-tsúaⁿ我 ē？」

「Pát 人做粗重...；你出 1-ki 嘴, 就是 tse 無 kāng！」A 玉 m̄知 ùi toh 位生--出來 ê 膽, 大聲 kā 平--a in。

「你查某人 bat siáⁿ！我去收錢 lóng 用 kiáⁿ--ê, tàk 工樓 kha、樓頂起起落落 teh tsōng, mā ē kap 工人 tàu 鋸柴、giáh 枋 á, 喘 kàu 強 beh 無 khùi, kám 無粗重？」

「我 m̄知 iáⁿ你 tsit 款粗重, 是 m̄是 kap 工人 ē 比--tit；m̄-koh, 人無食你 hiah 好--a？」

「Kā lín-pē tiām--去！ài 食肉是 pē 母生成--ê, 免你來管--我！」

氣話是 bóng 講 niá, iáu 是命要緊；ù tsit 工起, A 玉去菜市 á 無 koh 買半肥瘦 á ê 肉 tng 來 sáh；平--a iā 有比平時 khah khiūⁿ嘴, 若有肉 tī 桌頂, ē kīng 瘦 ê 食；總--是, 心肝頭有 1 點 á hàu 無 thiòng ê 感覺, 暝時..., ē 專工去麵擔 á, 切 1 盤三層 á 過 giàn--1-ē。

料 bē kàu--ê 是平--a 頭 kái thèh--ê 藥 á tsiah 食 suah, i 就有感覺著 bē ngiauh ê 悲哀, 做人上基本 ê 體面 bē 輸去 hōng tàn 去 thô-kha lap siāng 款, hō i 鬱卒 kah。

雖 bóng 是 tsiáⁿ pháiⁿ開嘴 ê kiàn-siàu tǎi, m̄-koh 查甫人是 m̄是有路用, kan-taⁿ看 tsit 項 niá, khah tsió iáu ē 忍--tit, 絕對 bē-sái 無, 所以 i 專工去街 á 尾 tshūe 開西藥房 ê 阿明, 看有 siáⁿ-mih phiat 步--無？

「Àh tō 我去看 kha 目 á, 食 tsit 款藥 á, kám ē án-ni teh 做怪？」

「按怎怪？」阿明 kā 藥 á tsih 來目睷前 tsin 1-khùn。

「È 事 niā-niā..., 暝--時...攏 bē..., 無論 gún 某按怎 jiòk mā kāng 款...」

阿明聽 bat i ê 意思..., 入去內面 tshūan 另外 1 種用雞 mng kóng-á 裝--ê, 講是特效藥, beh hō i tsah tng 去試, koh 吩咐 3 頓 ê 食 mih 免 tshiūⁿ íng 過 teh 禁忌, 想 siáⁿ就食 siáⁿ, án-ni tú 好有 hah 著平--a ê 意。

頭起先, 平--a 有想講阿明 kám ē 爲著 thàn 錢就 kā ūe 虎 lān, 無 teh 顧 jîn 情

義理，藥 á 食著心肝頭 tám-tám；等 kàu 2 禮拜過--去，i kap A 玉暗時 siōng tsiáp teh 做 ê hit 項 khang-khùe，ká-ná 有起色 ê 款，m̄-nā án-ni，kha 目 á lóng 無 koh 腫--起-來，害 in 2 ang-á-tsiá 歡喜 kàu bē 顧--tit，1-si-kè 宣傳講阿明比仙 koh-khah gâu，siáⁿ kah ē 食糕-á hit 1 樣。

後--來，i tsiah 知影去 hông siàn 大耳--去，騙 kha 目 á 止疼 niá，無 siáⁿ-mih 治療 ê 效果，tāi-tsi kàu tsia 是有較慢 kúa....，m̄-koh iáu 無講真 siong-tiōng。

大概 á 是半冬後....，平--a 雙 kha kūaⁿ 水，腫 kàu bē 穿鞋--lih，m̄-koh i iáu 是鐵齒 kah m̄ 去 tshūe 醫生，ngē tseⁿ 講是最近 2~3 工 khah 無眠，火氣 giáh--起-來所 ti--ê，kúí 工 á 過就 ē 好--起-來；A 玉叫 i 去基隆 hông 看，講 kah 強 beh 起冤家，mā 是無 tshái-tshiú，姑不 tsiong tiau 工 khà 電話 tng 去問 in 阿母....。

A 玉 in 老母心肝好 pháiⁿ lán ioh 無，頭殼內 teh 想 siáⁿ-mih 步 sò 無人知，2 母 á kiáⁿ tshi-bú-tshi-tshùh 講 tsiáⁿ 久 tsiah 掛。

電話 thih suah，A 玉 kā 平--a 講：「gún 阿母有 1 帖藥 á，講 tsiáⁿ 有效，我想 beh tng 來去 kā thèh 好--無？」

平--a 人 siān kah 強 beh 無頭神，心肝 tng teh sa 無 tsáng ê 時，聽著 koh 有仙丹妙藥 thang 試，tùi 嘴 in 講：「你緊去，mài koh 延 tshiān！」

隔工，A 玉 piàⁿ tng 厝 thèh，tùe 手 kā 藥頭 á thiah tng--來；tāk 暗照時間 tsuaⁿ hō 平 á lim，koh kā 平--a 講：「....阿母有 huan 咐，kha 目 á ê 血路 bē 通，tiòh ái 食 kúa 豬 kha 來 phah 通血路。」

平--a 有 tām-pòh-á giâu 疑：「豬 kha 有足 tsē 肥肉，m̄ 是 bē-sái 食--tit？」

「人....，阿母有交待講....，是 beh 食筋--lah，後 kha ê 筋 khah tsē 過肉，用筋來補筋，1-pit 1-tiōng。」聽--起-來 ká-ná tsin 有道理 ê 款，平--a iā 無 ke 講話，就 ki 在 A 玉去 bú。

藥 á 是 m̄ 是有對症 lán m̄ 知，iáu būe 見效 ê tsin 前，平--a khioh 著 thui 豬 kha 筋 thàn thiōng，歡喜 kah lān-pha 強 beh lut--去；mā-kú，sóng 無 3 工 ê 好光景，就為著透早死死昏昏叫 bē 精神，hiām 計程車載去台北急診--a。

好 ka-tsai 是計程車駛 kìn，命 tsiah khioh 有 tng--來，聽講目調險 á 就 tsheⁿ-mê--去；2 禮拜後，平--a 換坐輪椅出院，m̄-koh tāk 禮拜 ài 去台北洗 1-kái 腰子，hō 平 á kui 身人看--起來 gōng 神 gōng 神，khùi 力 tsiâu 無，bē 輸 beh khiau--去 hit 1 樣。

輪椅坐 4~5 工 liáu 後，換 thuh 枋 á；m̄ 知是 m̄ 是 siuⁿ 大 khō ê 緣故，ke 1 枝 kha teh kiáⁿ ê 平--a，pái--leh pái--leh，ká-ná beh khōng-kha-khiàu ê 款；m̄-koh，總比坐輪椅 khah 好看頭--1 絲-a。

頭 kái beh tng 去三總回診兼洗腰子 ê tsin 前 1 工，平--a hiām 大 hàn 查某 kiáⁿ 瑞苓陪 i 去西寧南路，hit 間 3 冬前 A 玉頭 tsiuⁿ-á 生查甫，平--a 出錢買來送 hō A 玉--ê 厝 hia tùa 暝；隔工，2-ê 人同齊坐計程車去三總，洗好 tsiah koh tng--來，連 sùà kúí nā 禮拜攏 án-ni teh 來來去去。

有 1-kái tú-tsiah kàu 台北，瑞苓 tī 信箱內，看著 2 張所有權人 tsiâu 是 A 玉 ê 房屋稅 ê 通知單，tsim-tsiok kā 看--落-去，1 張是現時西寧南路 tsit 間，另外 1 張是 khiā

tī歸綏街3樓，kàu taⁿ iáu m̄-bat 去--過 ê 公寓厝，目睷 ná tsīn ná kā 稅單 tu 去平--a ê 面頭前講：「a-pa 你看...；tsit 張是 siáⁿ？」

平--a 看1目...，腹內 hōng 火 tsik 時 tshing 起 lih 頭殼底，人差1絲 á 就昏--去，tsiah 2~3 秒 niá，i koh 清醒--起-來，出手收入來皮包 á 內，嘴角 ná tng 笑 in 講：「tse 是 lín 阿姨 in 後頭厝 10-kú 冬前買--ê，tsō A 玉 ê 名，頂半年講 beh hō in 小弟去做生理，名 tú-tsiah 過--過，是上尾 1-kái ê 稅單....」

瑞苓出社會無 kái 久，bē-hiáu 判斷 tǎi-tsi，liáh 準 a-pa 講 ê 是 tsin--ê，無 koh 問--落-去；ah-nā 平--a 是 àn 算洗好 tng--來，tsiah 來 bú tsit 條，tsit-má bē-sái tī gín-á 面頭前發性地；nā 是真--ê，tsiah 來好好 á 清算。

跳工洗好 tng--來 ê 平--a，kui ē-po 去樓頂 án-tsúaⁿ kap A 玉 tshik tsit 條 siáu，無人看--著。隔 tng 工，A 玉無 koh 行落來樓 kha，顛倒換瑞苓入來 giáh 錢 thuah-á ê 鎖匙；意思是 ùi tsit 日起，hūaⁿ 鋸木工廠 ê siáu 櫃已經換新人--lò。

Tsit-lō tǎi-tsi 雖 bóng 平--a 無明講，m̄-koh kui 工廠所有大大細細、老 ê 少年 ê 攏 teh hūe...；有人講 A 玉偷積 sai-khia hō 平--a tsang--著...；有人 ioh 講是 A 玉去 liáh 著平--a ê 猴，2-ê 起冤家...；mā 有人講平--a 知 iáⁿ i koh 食無 jūa 久，beh 防阿玉 kap in 後頭厝 hit tīn sán 鬼來搶 i ê ke-húe，所以先落手...；siōng hám--ê 是...，有人講平--a 洗腰子是 teh 做戲 hōng 看，實在是去台北設計 beh kā 工廠放 hō 大漢--ê hūaⁿ.....。

M̄管 tak-ê àn-tsúaⁿ 烏白 ioh，無人有 tui-tàng--kùe；顛倒是 2 ang-á-tsiá 暝時 sio-phah pìn-piàng 叫，m̄ 是查甫 teh tshoh kàn-kiāu，就是查某 teh 哀哀叫 ê 哭聲，厝前後壁聽 kah 現現現，眾人攏知是頭家 kap 頭家娘 teh 冤家，tsit 項真正有 tui-tàng。

Kui-tīn 人 àn 頭 kàu 尾，所 khîng 分 ê，無論錢 ah 是厝，攏是身外之物，是平--a bē 看破 niá；kàu tsit ê kha-táh i 猶 m̄ 斟酌 ka-kī ê 身命，tsiah 是 i 後過 siōng 大 ê 生死 mê 角。

平--a 原本就鐵齒 ê 人，m̄ 信洗腰子 ê 西醫 ē-tàng 治 i ê 病症，顛倒 piàⁿ 去 tshūe 第2某（腰 á）ê 後頭厝，去 hia 開講；i tsit-ê 古早屎放 bē 離 ê 丈人，kā in tsit-ê 有錢 m̄-koh 無緣 ê kiáⁿ 婿講：「你 mài koh 洗--a；西醫 m̄-nā 是 teh sùt 人 ê 銀票 á...，無 tik 確連你 tsit 條老命 mā ē 去 hō in tsit-tīn pián 仙 á 收--去！」

平--a 聽 kah 霧 sah-sah，緊 koh 問講：「kám 有影 án-ne--hioh？」

「Ná ē 無 iáⁿ！你看...，你去洗 hiah tsē pái，病院 ê 戶 tīng hō 你 lap kah beh ui--去，1-kái 4~5 千 teh iā，kàu taⁿ mā iáu teh 洗，有 khah 好--無？問你 ka-kī 就知--a！」

平--a 人 tsū-tsū，tiām-tiām 坐 tiām phòng 椅頂，想 1-khùn 講：「你 án-ne 講，koh 有理...；ah 無，你 kám iáu 有 siáⁿ-mih phiat 步？」

「是 m̄ 是換來 hō 漢醫看...；ù 根本 ê 氣脈開始調整，先 phah 通血路，食 kúa khah 滋養 ê mih 件，tshin-tshiūⁿ 龍蝦、九孔，來補身體 hō 勇 tsiah tiòh！」

平--a，bē 輸去食著 in tsit khō m̄-bat 字 koh 兼無衛生 ê 丈人 ê 符 á 水，hō 牽去基隆 1-ê ká-ná tsiáⁿ gâu ê 漢醫看；...講是長期風濕性 ê 關節炎，tì 使血路 bē 順，火氣 tshing kuan，衝起 lih 頭殼碗 á，tsiah-koh 降落來 5 臟 6 腑；講 kàu 有 kha 有 jiah，beh 20 萬 kā 包醫；tshûan 1 月日 ê 藥草 á，叫平--a thèh tng 去 tsuaⁿ 來 lim；m̄-koh，

tsit-kho王祿 á 仙有 huan 咄，腰子 kāng 款 ài 照洗 bē-sái 停。

雖 bóng 家內有 A 玉 teh iau 飽吵，hō平--a tàk 工心情 bē 爽快，強 beh 掠狂；m̄-koh，平--a ka-kī 有感覺著 tsit-kái 換漢醫 ê 藥 á，症頭有 liòh-á 起色，hō i 心肝頭 khah 安 tām-pòh-á: tsit 內面 ê 緣故，到底是漢醫 ê 藥 á 真正有效，àh 是腰子有 sù-a-sù-a teh 洗 ê 關係 tsiah ē-tàng î-tshí 平安無事，無人知 iáⁿ....；等 kàu thèh 下 1 月日 ê 份 tng--來 ê 時，平--a 就大主大意講...，靠漢醫 ê 藥頭 á 就 ē-sái，m̄免 koh 去洗--a；自 án-ni 車錢 kap 所費攏省省--起-來，無 koh 去台北。

2 禮拜後 ê 1 工透早，kám ē A 玉已經睏飽--a，想 beh 招平 á 繼續 tsa-hng 冤無 suah ê tāi-tsi，來 tshik 看 ē 清--無；thài ē 知 iáⁿ，人死死昏昏--去，仙 hiàm to bē 精神，手去摸額頭 iáu la-lun 燒，A 玉 ai kah bē-su 去 hō 鬼 heh 驚著 án-ni，ù 3 樓 phiaⁿ 落--來樓 kha，huah 人起 lih tàu kha 手....。

Tsit-kái，平--a 是去台大急救，tù 入去加護病房，lóng 無 koh 醒--起-來，tàk 工 un tī hia 洗腰子，tsiah 過 1 禮拜，醫生就交待家屬 ài 選 1-ê 好日，tàu sansoh 坐救護車 tng--去。

聽講 A 玉 kah 平--a hit 3~4 ê gín-á，tsin 前攏知 iáⁿ ē kiáⁿ--去，無半 ê 人肯 tī 病院陪平--a，kui-tīn 顧 teh sio 爭樓 kha 錢 thuah-á ê 鎖匙；店面 tàk 工出入 ê 現金，sùi 人搶 sùi 人 ê，袋--入-來-ê，無人 jīm ē 出--來，講著 beh 納台大 ê 醫藥費，就 sio the sai 死牛，放 leh hō 拖；àn 頭到尾，無半 ê 人有去煩惱睏 tiàm 病床 ê 患者是 ka-kī ê 序大，死活 bē 輸 kap in 無 tī-tāi kāng 款，平--a tiāⁿ 著無 kng--tng-來 bē suah。

平--a 昏--去 hông 載去急救，到 pîn-tuaⁿ 喘 khùi 止，攏無清醒--過，beh 死無交待 kah 半項，就去蘇州賣鴨卵--a。

11、眾 tsiaú beh 食番 á 通 ê 粟

苓姐 beh 霸經營權，阿叔份額錢 kā tshûan，
Tàu-khang 小弟同齊反，阿玉矢志 iap 尾 suan，
掠準按呢就圓滿，暢無 3 工攔再冤，
相爭財產靠手腕，平兄若知一定怨。
苓姐有枉真 pháⁿ 款，財產分 tsē 上早完；
小弟 kiⁿ 行跋 kiáu 館，輸到褪褲無來源；
威煌 hìng pháⁿ 無人管，深錢 hông jiok phih-phèh 喘；
瑞卿認份人 bē 番，嫁著好 ang 猶完全；
威章靠母較平凡，雄雄得病魂早斷。

Tī 車頭邊賣燒餅 ê 順 á，tú 好去 tng 著 in tùa 宜蘭三星 ê 2 兄安 á，tng 來 beh tàu-saⁿ-kāng。

順 á kā kiú úa--來，tsiáⁿ 細聲講：「siàng hiàm 你 tng--來-ê？」

安 á：「是瑞苓....」

順 á：「i mā 有 hiàm--我-neh。」

安 á：「oh；....平--a tsit 3~4 ê gín-á，khah 早 to tsin tsheh--lán，是 án-tsúaⁿ tsiah 好

禮--leh？」

「你 mā tsiāⁿ奇！lán 是 in 阿叔，算--起-來是 sī 大，kā lán hiām，mā 無^{m̄}著！」

「Mài gōng--a，lán 是 hō in 老 pē 踢--出-來 ê pùn-sò，tsit-ê 冤仇你 kám bē 記--e？」

順 á tùn-teⁿ 1 時 á：「你 ê 意思....，in 是有求--lán ê 所在--lō？」

「我是 án-ni teh ioh；時 kàu 就知！」

10 外冬^{m̄}-bat koh peh--起-來 3 樓 ê 順 á kap 安 á，坐 tiām 膨椅頂，目調掠 4-kho-liàn-tng ê 壁櫥、紅 kè 桌、khatian 金金 siòng，看 khah 強 beh 神--去，hiông-hiông 瑞苓泡 1-kó 茶入--來：「pháiⁿ勢，hō 2-ê 阿叔等 tsiāⁿ久；來，趁燒 tsiah 好 lim。」

順 á khah 緊性，未 lim 就趕問講：「瑞苓，有話 mài 拖...；今 á 日好天，我 ài tng 去顧餅擔--neh。」

「Án-ne 我就直講...；ah-tō...，無 siáⁿ重要--lah，想 beh 問 lín ê 意見....。」

安 á 顛倒 khah tiāⁿ著 sùi in 講：「是^{m̄}是鋸木工廠股 siaⁿ ê tai-tsi？」

「是--lah，阿叔。」

「你講看--leh！」2 兄弟差不多是同齊，攏 tùi 嘴 án-ni in 瑞苓。

瑞苓 lim 1 嘴茶 tsiah 講：「lín 2-ê...，sùi 人有 10-pha ê 份額，我有想 beh 買，^{m̄} 知 lín ê 意向是....？」

安 á kap 順 á tsik 時無話，ká-ná 無神魂，tiām-tiām 顧 lim 茶，bē 輸無聽著瑞苓 tú-tsiah 講 ê 話 kāng 款，1-au thîn 過 1-au，bē-tit thang suah。

瑞苓看講今 á 日 tiāⁿ著無結局，就出嘴：「阿叔...，hō lín 想看--leh，ke kúi 工 á，喪事辦好 sè，lán tsiah koh 來 tshik，好--無？」

Chit 項 tai-tsi ē 變 án-ni，ài 先講 túi 斯當時，平--a beh 來頭城 khui 鋸木工廠，有賣 kúa 祖公 á ê 田 kap 山來做本，hit-tsūn 爲著趕 beh 提現金去買 tsit 間工廠，有 kap in 阿 pa 約束...，後過公司 ê 股 siaⁿ ái 分安 á kah 順 á；等到老 pē 真正過身了，平--a kap A 文參詳 kui-pō，beh kap 分祖產 ê tai-tsi 做 1-ê 解決，決定 hō in 1 人 10-pha；平--a 想講 i ê 份額有百分 50，tú 好過半，就 ē-tàng hūaⁿ siàu 櫃，專權主意 kui-ê 工廠 ê liáu-thàn；tshun--ê 攏是無 tsiūⁿ 10-pha ê 小股有 10 外 ê，beh 登記分 hō siáng，已經^{m̄}是 siōng 要緊 ê tai-tsi，tsuaⁿ-á kā 寫 tī 公司持分 ê 契約內底。

頭起先，平--a hūaⁿ 鋸木工廠，tshiāng-tsāi haiⁿ tsia bē 順、hia bē-tit tú 好，khue-hài 1 大拖，kàu 冬尾結 siàu，就講無 thàn 錢，^{m̄}分紅利 hō 眾股東；第 3 冬起，顛倒 kā 股東 tshiāng 聲講 ài 提錢來增資，nā 無，工廠 ē tshia 倒擔；頭 1~2 kái iáu 有人信--i，乖乖 á 嘴齒根 kā-ân，tng 去 tshúan 棺材本來 thūn tsit 窟永遠看 bē 著底 ê 屎 hák-á khang，thing-hāu 4~5 冬 á 過，hāu-siáu 話聽 kah ià-siān--a，攏 kiu kha 收手^{m̄}願 koh 出本，kì 在平--a 做手去 bú 增資 ê thò-thâu。

I 用「大股食細股」ê 步 sò，hō pát 人股 siaⁿ ê 份額 jú iūⁿ jú 細 tè，是 áu 蠻外人 niá，對 ka-kī 小弟 ê 股 siaⁿ 顛倒 tùè 增資 ê 比例，î-tshī tī 10-pha ê 份額內底無變，算--起-來，iáu 有 1 絲絲 á 天良。

平--a 現時有 6-ê gín-á (5-ê 腰 á 生--ê，1-ê A 玉生--ê 號做威章 tsiah 7 歲 niá)，hām

A 玉算在內，財產 ài 分做 7 份；瑞苓是 siōng 大漢 ê 查某 kiáⁿ，有想 beh 做頭 kap i kāng 老母生 ê 4-ê 小弟、小妹霸佔鋸木工廠 ê 野心；m̄-koh ài 先 kā in 後母 á A 玉踢走，tsiah bē 纏 kha 絆手，所以 tshūa 頭先落手爲強，tshūe 順 á kap 安 á 來 tshiâu，用 400 萬 ê 現金 kā in 2-ê 阿叔 20-pha ê 份額，總買--落-來；liáu 後，開臨時股東會 ê 時，公司 ê 經營權就去 hō 瑞玲 lāk--著-lō。

喪事辦 suah 無 jūa 久，A 玉手牽 sè-hàn-kiáⁿ 威章，m̄ 情願 koh 無 ta-uá，tshiàⁿ 1 台中型 ê tho-la-kuh，搬去台北西寧南路 tūa，tsiáⁿ 罕 leh koh tng--來-a；m̄-koh，in tsit 5-ê 姊弟 á mā bē 合，tāk-ê 奸奸鬼鬼 teh 防來防去，tàu-khang to 無 1 月日 hiah 久，就爲著 siáⁿ beh 管錢、走外務、hūaⁿ 內場 teh khîng-hun bē suah，kui 家亂糟糟。比論講錢收--入-來 beh 寄 siàng ê 戶頭，就冤 2 禮拜，強 beh 起 sio-phah...；門市現金 ê 生理，輪著 siàng 顧就 siàng 收，úa beh 1 半 ê 錢攏無--去，bē 輸去 hō 鬼 khiang--去 hit 1 樣...；應收款 ê 賒 siào 單，tēⁿ tī 瑞苓 ê 手，i tāk 工 teh 外口 kōng 收 tsiah ê 錢，nā 有收 mā 是歪來做 ka-kī ê sai-khia，無人知 iáⁿ i 到底收 jūa-tsē ê 應收款；siōng 害--ê 是....，tng 來店--nih，koh ē giâu 疑顧店 ê 小弟偷 khiang 現金，罵大唸細...；另外，人頂手 ê 廠商來收 siào，講著 ài 付款就 sūi 人 bih kah 遠遠遠，無人 beh 出來 tsih-tsiap，hō 生理人走 kúi nā tsūa iáu 收 bē 著...；tshin-tshiuⁿ tsit 種冤家 niō-tsè ê 齣頭，tāk 工搬 kah bē tit suah，無 tshái 平--a 一生用心計較，粒積 tsiah-nih tsē ê ke-húe，半冬就烏有去--a，人講「眾 tsiaú beh 食番 á 通 ê tshik」，thài ē-sái tòng jūa 久--leh？

論真來講，鋸木工廠是 m̄ 是停 khùn 無做、是 m̄ 是無生理，suah 無人去煩惱 tse，顛倒是工廠 tsit-tè 土地 kap 厝，hō A 玉 kap hit 5-ê gín-á 攏 teh giàn-sian-ko，tsiah 是 in ē khîng-hun ê 重點；2 棟 4 樓 khiā ê 透天厝，邊 á 連 3 間 iáu bue 起 ê 空地 lóng úa 大路邊，tshāi teh 街 á 底 siōng 鬧熱 ê 所在，tiāⁿ 著 tsin 有價；另外工廠後面 úa 鐵 ki 路邊 kā 鐵路局租 ê 柴埕，雖 bóng 是權利 niá，有買賣 ê 優先權，tsit 300 坪 mā 燒熱 kah hō 人流嘴 nūa；好 ka-tsai 繼承不動產是照法律 teh kiáⁿ，有 khah 公平 tām-pòh-á，無 tshiuⁿ 經營權 ē-táng piⁿ 鬼 piⁿ 怪，m̄-koh 散做 7-tè 來分，就碎 iām-iām--a。

瑞苓提著 siōng tsē ê 財產，1-kúa 是公開分--ê，1-kúa 用搶--ê，應該 tsiáⁿ 好過 tsiah 著，偏偏 i 嫁著 1-ê beh 食 m̄ 討 thàn ê 浪蕩子，bē 輸 thui 軟 ê khaⁿ-á-sian kāng 款，差不多 2 年，就 kā 繼承來 ê ke-húe khai 盡，路尾 á 有離緣，m̄-koh 已經 siuⁿ 慢--a。

第 2 kap 第 3 kiáⁿ，bē khai、bē lim 擱無食薰，mā-kú 2-ê 人 bē-su sai 公 á sīn-pue，見 kiáu 就 pūah，麻雀、10-ô-á、sak-tōng-á kap 天九牌 tāk 項 ē，人招就 kiáⁿ koh ī m̄ 知 suah；路尾 2 兄弟 á 聽講是去職業場 hō 人 tsián--去，險險 á 連 lān-pha to 割--起來 tng，欠 kúi-ā 百萬 ê kiáu-siào，自 án-ne 同齊走去 bih，無 koh tng--來。

第 4 ê 威煌，khah 風神 khùi，hìng 做好看頭 ê khang-khùe，先 kap 人合股開日本料理，做無 jūa 久就 liáu kah thng 褲；sua--lueh，去基隆開 1 間 kan-taⁿ tshiáⁿ-kik 就開 7-8 百萬 ê 地下舞廳，ka-kī hūn 上大股，koh m̄ 認真去管顧，顛倒 tshiáⁿ 2-ê 王--哥、柳--哥來 hūaⁿ 內外場，無論 liáu、thàn 據在 in 去舞；另外爲著 kik 派頭，買 Benz --ê 來駛，tāk 工載 2~3 ê 同齊 tshit-thô ê 兄弟去茶店 á、bā-á 間 phāⁿ，m̄ 是酒就是查某，tsiah-nih 爽 ê 日子，bók 怪 hiau-pai kah。

Thàn 錢 siuⁿ軟，hō 人目 khang 赤，舞廳開無 jūa 久...，hō 1-ê 起酒 khong ê 細漢 --ê，ù 出入 ê 電梯口潑汽油放火，kui 間 ê 裝潢燒 kah 離離離，好運無死人，才無食官司，m̄-koh 1-kái 就烏有去--a，人講台灣無 3 日 ê 好光景，確實有 iáⁿ。

自細漢小兒麻痺 pái-kha ê 查某 kiáⁿ瑞卿分上 tsió，平--a būe 過往 tsin 前，kā 招 1-ê 古意 koh ian-tâu ê 少年 ang 號做阿中，有 kah 1 間樓 á 厝 hō in，koh hiàm 阿中入來工廠，tshūe 1-kúa khah khin-khó ê sit 頭 hō 做，有 iáⁿ tsin 得人疼；可惜平--a 死了 siuⁿ早，工廠停工，in 就 tùe 工人四散，聽講是落去 ē 港，做啥頭路無人知。

阿玉有 kap 平--a 生 1-ê 查甫號做威章，tùe in 老母去西寧南路 tùa，高中考 tiâu 師大附中，hō 阿玉歡喜 kah bē 顧--tit；ù 中興大學會計系出業 liáu 後，免做兵 tō 去私人公司食頭路，平平安安差不多 tsiáⁿ 10 冬，做 kàu 會計部 ê 經理，日子 bē bái 過，是 m̄ 是天公伯 á 怨妒 i siuⁿ gâu ê 款，竟然有 1 工，無因無端死 tiàm 眠床頂；聽講，是 A 玉去 phah kui 暝 ê 麻雀，透早 tng--來，叫 bē tsing-sîn，自 án-ni kiáⁿ--去；hit 年，無娶某 ê 威章 tsiah 32 歲，掛 1-ki 金框 ê 目鏡，體格無 lò，外形肥軟 á 肥軟，kah in 老 pē 足 sio-siāng--ê；人講大 kho 有種，腦充血 mā 是 kāng 款，無 tik 確就是 án-ne，tsiah ē bē 赴飼，就去西方極樂世界，kap in 老 pē 做伴--a。

12、白鴿絲較 gâu 討食，嘛無 kha 後堵肉

拗蠻鬼計伊無罪，半強半搶積家伙；

Hiau 倖失德 oh 收尾，快活開錢緊狼狽。

經國先生過身，翻 tng 年 ê 新正，我 tī 瑞芳火車頭 ê 地 hām 口，去碰著 tsiáⁿ tsē 年無看--著 ê 天祥，我出嘴先 hiàm：「ueh！天祥...，你用 tsōng--ê，beh 趕去 toh--leh？」

「Ah，是南 á 你--ò，我 kioh 是 siāng...；suah m̄ 知 beh 入來去頂雙溪，火車 tshun 5 分 niá，m̄-tsiah 用走--ê！」

「來去厝--ê 坐 1-khùn，ē-tsūa 車 tsiah tng，kám m̄ 好？」

「我看，另日--lah；ah，tiòh！... lán 人 2 月 15，內平林 giá 王公，gún tau 去抽著爐主，有 beh thài 豬公，tsiah 來 hō gún 請...；火車來--a，我先失禮...」ná 講 ná 走，用 phiaⁿ--ê tiò 落去地 hām，koh peh 起 lih 月台，khia tī 車門邊，手 iáu iat bē suah。

我照 hit 工約束 ê 日子，透中 tàu ka-kī 1-ê 入去內平林 tshūe 天祥，遠遠 beh 入去 in tau ê 田 hūaⁿ-á 路 khiā kui tsūa tsiâu 人，連閃身 to 無 kha 路，厝前 tah 布帆 ê 稻埕，全 hō 陣頭 kap 八音 tsiⁿ kah tsát-tsát-tsát，我想講 i tsit-tsūn tng teh 無 îng，lîng-khó 先 uat 去番 á 坑 ê 祖厝 bóng sèh bóng 看 khah tit，mā thang 去埤 á 邊巡舊年 súa 栽 ê 檳榔 kap 山杉（竹柏—羅漢松科），大 liáu án-tsúaⁿ--a；巡 suah，koh 行去埤頭看水 pān，thng 赤 kha 落去潦生冷 ê 溪 á 水，掀石 kó tshūe 蝦 á 來 sng，khah 大 tsiah--ê 塞入去嘴 khang tshiⁿ 食，細 tsiah--ê 弄弄 sng-sng--leh koh 放 i 逃生，kàu 日頭 beh 落山 tsiah ún-ún-á sèh tng 來內平林。

稻埕 ê 酒桌 tshun 無 kúi-ê 人 tī hia，遠遠就聽著天祥 teh hiàm：「是南--a hoⁿh；你食--būe？khah ē tsit-má tsiah 來--leh？」

「Ah-tō 先 sèh 去番 á 坑 tshūe 人講話--lah ! 」 ná 講 ná 坐落來桌邊 ê 椅頭 á 。

「腹肚 iau--lò , 來... , 先 lim 1 杯 ! 」 thîn 1-au 紅露酒 tu 來面頭前。

實在 mā iau--a , tù 手先 kā hit-au 紅露酒 kiāt 落--去腹肚底 , 出箸攏無 sè-jī , tàk 項 ngheh , 1-ki 嘴 pō 無 hioh , 燒酒 ná lim ná 聽 i ũe 虎 lān , liū 1-kúa íng 過做兵、讀冊 ê 笑 khue tāi , 食 kah 飽 ti-tu tsiah 收桌 , koh tshūan 老人茶 beh lim ê 時 tsūn , 天已經烏--來-a 。

天祥 thîn 滾水沖茶米 , ná 講 : 「舊年中秋 , 我有去 tú 著威煌 , teh 夜市 á 賣牛肉麵--neh ! 」 , 沖好 koh kā 茶 kó 蓋 khàm--tng-去。

「Toh 位 ê 夜市 á ? 」

「八斗 á ê 市場邊 , úa 發電廠 hit sì , 生理 guan-ná bē-bái ê 款。」

「老 pē 過身 7~8 冬 , 就 pìⁿ kah 去賣麵 , 實在無 siáⁿ-sì。」

Kā kó-á giáh kúan ián-khi 倒入去茶海 , phang khùi tshìng 起來鼻 khang , 天祥 ná 鼻 ná súa au-á 講 : 「...福氣早 lóng 先享盡--a , khah 有 siáⁿ-mih 苦憐--leh ; 天公伯 á 發落 i 去 ku 路邊擔 á , 無叫 i 去做乞食 kâng pun , 就算 bē-bái--a ! 」口氣無 jūa 好。

我 ná lim ná 講 : 「i kap 你 kám 有冤仇--hioh ? 」

「.....suah m̄ 知 tsiaⁿ tsē 冬前 , gún 妹婿 tī 基隆廟口邊 á ê 巷 á 內 , 排米粉湯擔 ê 時 , i tú-tsiah khui 地下舞廳 , tiaⁿ-tiaⁿ 三更半暝招 1-kúa 兄弟來 lim 欠--ê , koh 交待講積 khah tsē--leh , tsiah 來店--ê 收... 」

「路邊擔 á , thài 有 hông 賒 ê 道理--leh , lín 妹婿 kám bē 曉先 kap i 明 ho ? 」

「ná ē 無... ; 是 tsit-kho 威煌 ài hong 神 , 硬 beh 用簽--ê。」

「路尾有還--無 ? 」

「4-kò 月 , 積 2 萬外 kho ; 去討... , tsiah 知影舞廳倒去--a ! 」

「有去 in tau tshūe--i-無 ? 」

「Khah ē 無 ! 」

「I án-tsúaⁿ 講--leh ? 」

「I 講舞廳 hông 放火燒 , 3~4-ê 著傷 , kàu taⁿ iáu teh hòk 藥 , 欠人 tsiaⁿ 千萬 , beh 準備放 hō 倒 ; koh 講... , 深--人 ê 錢 , 若 beh 用 i ê 頭毛 1-ki 估 1 萬 , mā 無夠還--人... ; 聽著 tsit 款番 á 話 , gún 妹婿講 i 險 á kā ka-kī ê lān-pha tùi--破 ! 」

「論真來講 , lín 妹婿 siuⁿ 軟 tsiaⁿ.... ; nā 我 , 就 tsah 刀去 kap i 輸贏 , tshùn 辦無錢就 liō 人肉 tng--來 ! 」

「Án-ni kám 就討有 ? 」

「Tse 你就 m̄-bat--a , 好命人驚死 , giáh 去 hia bóng lāng bóng hat , hūan-sè 乖乖 á kā 錢 phóng--出來 , 是 lín 妹婿無去試 niá。」

天祥 tiām-tiām 想 1-khùn tsiah in 講 : 「i 人 kó 意 , mā 無 hit-lō 心臟 , 去討 tsit 款 pháⁿ-siào ; aih ! hiah 久--a , i 早 tō kā 當做 『有生準無 pū』 , tāi-tsit tsuaⁿ-á suah--去。」

「就是 án-ni , 你 tsiah ē hiah tsheh--i。」

天祥 ná koh thîn 茶 ná 講 : 「m̄-nā tse... ; gún 老 pē , íng 過有 hūn 鋸木工廠 , 是小股 niá , 就是 bē 堪 tit 平--a 『大食細』 ê áu 蠻 tsiah 退股 , 100-kho thèh 無 10-kho tng--

來；冤仇是 hit-tsūn 就結--a，現時 tse iáu 是細條--ê。」

我 ná lim ná 講：「taⁿ攏免 koh tsheh--a，平--a tsit 世人所搶--人-ê，差不多 ā 總吐吐--出-來-a，人講——án-tsúaⁿ來--ê，就 án-tsúaⁿ去，1 點 á to bē tīng-táⁿ！」

Hiông-hiông 天祥 koh 問：「威煌 iáu 有 2 ê 兄哥——添福 kap 偉利，mā tsiáⁿ 久攏無 koh 看--過，m̄知死 ùi toh --a！」

「我看....，是 làu-phàu--lō。」

「平--a 留 hiah tsē 財產，in kám khai ē 空？」

「2 兄弟 á kui 日顧 púah kiáu，thài 有 jūa-tsē 本 thang án-ni 舞--leh，tshin-tshiūⁿ 火車開 kàu 基隆，早就盡 pōng--a！」

「你 jūa 久無 tú 過 in 兄弟 á？」

「平--a tái tī lán tsia 頂坪 á 埔 ê 公 thióng，kap gún tau ê 風水足 úa--ê；頭 2~3 冬 ê 清明 iáu 碰 ē 著 in 兄弟 á 來 pūe 墓；後--來，是 m̄ 是 tshiáⁿ 人 phù 墓草，áh 是 beh 閃債主 kā 討錢 tiau 工避開清明 tsit 日 ê 緣故，橫直 m̄-bat tī hia koh tú--過-a；tsit kú 冬，連街 á 底 mā m̄-bat koh 看著--a。」

「Bók 怪聖王公廟 hia ê 人，攏講神明有 siáⁿ....；南--a，你看--leh？」

「平--a 一生鬼鬼怪怪，奸巧 kah 無人 ē 比--tit，頭殼 tsiáu teh 想 lián 錢 ê 步 sò，kiàn piⁿ ê 齣頭全 beh phiⁿ--人、搶--人，有 iáⁿ 粒積足 tsē 田園厝地；i ê 性地 nā khai tī 查某 ê 錢 tsiah ē 出--tit 以外，平時儉 kah beh khàu-pē，罕 leh 開著錢；若祖公 á 屎扣--起-來 má 算，應該 tshun 有 1 億 hiah tsē，ka-kī 儉腸 neh 肚，顛倒留 hō in tsit-tīn liáu 尾 kiáⁿ 烏白 phún、khùⁿ 活用，3~5 冬就 hi-leh-leh，tshin-tshiūⁿ 山崩 án-ni，仙來 tòng mā bē tiâu；人講『hiau 倖錢失德 liáu，失德錢 púah 輸 kiáu』，若 m̄ 是有 siáⁿ，thài ē hiah 緊--leh？」

做 1-khùi 講 suah ê 時 tsūn，對平--a 所有 ê gīng 心怨 tsheh tsik 時 lóng 無--去-a，心肝頭 bē 輸 tit 著消 tháu kāng 款，做 1-ē lik-līng--落-來；tsuaⁿ-á 2-ê 人顧 lim 茶，話母牽 tui 開春 ê 雨水 kap 播田、擔秧 á ê sit 頭去，無 koh 去講著平--a íng 過 ê tái-tsi。

Úa beh 10 點 ê 款，天祥招我 tiàm in 厝過暝，我無允--i，專工 ùi 外口 hiàm 1 台計程車入--來，載去火車頭坐尾 pang 車 tít 去瑞芳。

13、有起有落 teh 運轉

神明有 siáⁿ無？講來真含糊，siáⁿ ê 落紅雨，m̄信 tàn 溪埔；

平兄變富戶，田園 oh 去估，看來是無辜，敢準有神助。

論講豬腳 kho，矮身變大肚，腳目無 khà 顧，腰子洗來滷；

病疼面攏烏，受難到落土，是 siáng kā 怨妒，拖磨入恐怖。

囡孫品性粗，ng 鑽為財謀，全學 àu 步數，khai púah tsiáu 走路；

賣麵罔來度，回轉當起初，若講有疑悟，ná tiòh hiah 辛苦。

Nā 講神明有 siáⁿ....，應該是 ùi 平--a tshò 聖王公廟邊 ê 大柴 liáu 後，súa 去雙溪街 á liáu 柴 ê 時 tsūn，tiòh-ài hō i 失敗、破產 tsiah 著；m̄-koh，廟邊 ê 人攏講平--a ê 頭 tsiuⁿ-á kap 市 á ē 死 sio sù 去，就是聖王公換另外 1 種步 sò teh kā 平--a kà-sī，

是平--a ka-kī bue-hiáu 自省、bē 覺醒。

後--來，平--a 有法 tō 順序來 kàu 頭城，khui 鋸木工廠 thàn 大錢，hiau-pai kah 掠 bē tiâu，講 1 句公道話，是 i 有祖公 á 屎 thang phún，koh tú 著「光復」後時機 tng 好 ê 緣故，thài 是 i gâu--leh！m̄-koh，i ah 霸 kap áu 蠻 ê 性地原在無變，hō 眾人攏 teh kha-tshng 後怨--i、tsheh--i，是 i m̄ 知 niâ。

Tī tsit 段時間，i 上細 hàn ê sió 弟自盡，平--a 講 tse 是少年人 tshóng-pōng bē-hiáu 想，死就做 i 去死...；另外 in 老 pē 中風 tsiah 來過身，平--a 講...，人是緊早慢 niâ，食老生成 ē khiâu，iáh m̄ 是 siáⁿ-mih 奇巧 ê tai-tsi；ah-nā 第 2 某——腰 á 七少年八少年就 tì 病過身，是悲哀 1 禮拜 niā-niā，目 nih-á sùi 過--去，顛倒 thiong 著平--a koh 娶新--ê，ná ē 艱苦--leh？

若 beh 講神明有 siáⁿ...；直接報應，hō i liông-pūe 就好--a，thài ē hiah 費氣，án-ni teh piⁿ--leh？

有 1 工，我入去聖王公廟 hia tshūe 人講 2 句 á 話，teh 廟前用手拜拜，tú 好去碰著頭髮 tsiâu 白，身穿對 khim-á 衫 ê 廟公；2-ê 人 3 講 4 講 koh 牽 tùi 平--a hia 去，i 講：「...siuⁿ 愛就 ē 死，平--a 就是 1-ê 例。」

「是 án-tsuaⁿ 講--leh？」

「Siuⁿ 愛就是貪；貪外口 ê 查某 súi，就 ē 惹禍端，吵家亂宅，無 ìng kàu i 死；貪不義之財，鑽 khang òng phāng 去 pián--人，全精神去 tsim-tsiok 錢財，就 bē 顧 tit 老命 ê 生死，mā 無 teh 管 kà 序細是 m̄ 是 pháⁿ 品性；ka-kī 無醫藥 ê 常識 koh bē khiūⁿ 嘴，貪著豬 kha kho 好食，1-ki 嘴 tshin-tshiuⁿ 屎 hák-á khang thūn bē tīⁿ，tiāⁿ 著無死 bue suah！」

「你 án-ni 開 phua，koh 不止 á 有道理...；論 tsin 講，tse kám m̄ 是報應--leh？」

廟公 tu 1-ki hun úa--來，順 sùà thèh 桌邊 ê 燭台點 i ê hun hō tòh，koh súa 來 hō 我 ná 引，ná 出嘴講：「報應...，是一般人 ka-kī 想--ê，講來消 tháu 心肝內 ê 怨 tsheh niâ，世間 khah 有 tsit 號 tai-tsi--leh！」

「án-ni 講我聽無，是 m̄ 是講 khah 白--leh。」

「社會上做惡做毒 ê 人，攏 ē 受著法律 ê 制裁 liáh 去坐監；m̄-koh，為非 sám 做若 bue kàu 坐監 ê 程度，是違背天良、道德欠點 ê 問題，kāng 款 tī 街 á 路 hòiⁿ 來 hòiⁿ 去，siau 遙自在。Kik-ke 是 hō 眾人怨 tsheh、siàu 唸，苦無 thang i 緊去死死--leh；nā tú 好真正 sùi 死--去，人就 hán 講 tse 是現世報；nā 死著某 kiáⁿ，就 phah-phòk-á 講是報應；nā 後過 kiáⁿ 孫 á 狼狽，就指指 tùh-tùh 講是前世帶來 ê 因果。」

「你講 kui-po，mā 是講著報應，我 jú 聽 jú 花！」

「是 án-ni--lah，我來 thiah khah 明--leh。」

「好！你講...。」

「Beh kā 人掠去籠 á 內關，政府有 tshûan 1 套法律做標準，照規定 ê 程序起訴、審判，有罪 tsiah 受著制裁，是通人知 ê tai-tsi；m̄-koh，違背天良 kap 道德欠點 ê 標準是 siáⁿ？siáng teh 做裁判--leh？論講平--á 『大股食細股』 ài 受著報應，ah-nā

亂 tàn hun kùeh-á、烏白放屎尿 kap tshòng-tī路邊 ê 流浪狗--leh？」

「Án-ni 我知--a，tsit 款標準是設 tī kok 人 ê 心肝內，ka-kī koh 兼做無月給 ê 判官；tshèh--i 就判 i 是 pháiⁿ人，ài--i 就講是好人；pháiⁿ人 nā 有意外，就講是現世報，應該死--好；若 iáu 好好無事，就暝日 siàu 唸，tāk 工心肝 gīng，氣 kah bē 食 bē 暈！」

「所以平--a tsit 世人攏是為著貪；貪查某、貪 pát 人 ê 錢，iáu 是 sió-khúa tã，路尾是貪食豬 kha kho tsiah 無命--ê；kāng hit-ê 時代，好 giáh 人食好做輕 khó，tī 著腦充血、尿酸 kûan tsiah 掠去種 ê 人 tsiâⁿ tsē，kám 講 in kap 平--a lóng 是報應--mah？」

「好，準講 m̄ 是！iah m̄-koh in kiáⁿ--leh？」

廟公嘴 á 笑笑講：「tsit-ê 道理是 án-ni...；權力、地位、名聲、錢財 kap 某 kiáⁿ，tsiâu 是身外之物，無論祖公 á 留--落-來-ê、áh 是 phah 拼 thàn--ê，一旦 kah 失--去，是回復 kàu 斯當時，tāk 項攏空空 ê 時 tsūn hit 1 樣；命 nā iáu tī--leh，mā 有可能 koh thàn --tng-來，tshin-tshiuⁿ 月光、月暗 án-ni，有起、有落 teh 運轉，m̄ 是輪著平--a in kiáⁿ 就是輪著你、我，是時間緊慢 niâ，siáⁿ-mih 人 to ē 碰--著，kám 講 tse 是頂 á 所講 ê 報應--mah？」

講 kàu tsia，我 kán-ná 聽有，koh kán-ná 聽無，就無講 sù--落-去-a，換廟公招我入去食暗，講是粗菜便飯...；2-ê 人有 lim kúa 燒酒 koh 食 kah kéⁿ-kui tsiah 收碗箸；beh 走 ê 時，我 jīm 1000-kho lok 入--去功德箱做香火錢，gún 2-ê 人同齊 kiáⁿ 出--來外口，khia tī 廟埕中央，一直開講 kàu 計程車來載--我。

—END—

2007-03-12 AM 0822

3.12 郵寄掛號

(本篇獲第四屆海翁台語文學獎小說類正獎 2007-05-31)